

V.

## Styx, sive Fœdera:

Pervulgata est narratio, & in compluribus fabulis, interponitur, de unico illo Iuramento, quo Diis superi se obstringere solebant, cum pœnitentiae locum sibi nullo medo relinquere volebant. Illud Iuramentum nullam Majestatem cœlestem, nullum Attributum divinum advocabat, & testabatur; sed STYX, Fluvium quendam apud inferos, qui atria Ditis, multis spiritis interfusus cingebat. Hac enim formula Sacramenti sola, neque præter eam alia quæpiam, firma habita est, & inviolabilis; Scilicet incumbebat pœna perjurij, Diis in primis metuenda, ut qui fefelleret, ad Deorum convivia per certa annorum spacia non accederet. Fabula de Fœderibus, & patris Principum cœnœcta videtur; in quibus illud nimis plus quam oporteret verum est; Fœdera quâcunque solennitate, & religione iuramenti munita, parum firma esse, adeò ut ferè ad existimationem quandam & famam, & Ceremoniam, magis quam ad fidem, & securitatem, & effectum adhibeantur. Quin si accesserint etiam affinitatis vincla veluti Sacraenta Naturæ, si merita mutua, tamen omnia infra ambitionem, & utilitatem, & Dominationis licentiam esse, apud plerosque reperiuntur. Tantò magis, quod Principibus facile sit per prætextus varios, & speciosos, cupiditates suas, & fidem minus sinceram (nemine rerum arbitro, cui ratio sit reddenda) tueri, & velare. Itaque unum assumitur verum, & proprium fidei firmamentum, neque illud Divinitas aliqua cœlestis. Ea est Necessitas, (Magnum potentibus Numen;) & Periculum Status, & Communicatio Utilitatis. Necessitas autem per STYX eleganter representatur, Flumen fatale, & irremeabile. Atque hoc numen advocavit ad Fœdera Iphicrates Atheniensis, qui quoniam inventus est, qui ea aperte loqueretur, quæ plerique tacite animo voluunt, non abs re sit, ipsius verba referre. Is cum Lacedæmonios, varias Cautiones & Sanctiones, & Fœderum firmamenta, & vincula excogitare & proponere animadverteret, interfatus; Vnum (inquit) Lacedæmonij, nobis vobis cum vinculum, & securitatis ratio esse possit, si planè demonstratis, vos ea, nobis concessisse, & inter manus posuisse, ut vobis facultas lædendi nos, si maximè velletis, minimè suppere possit. Itaque si facultas lædandi sublata sit, aut si ex fœdererupto periculum ingruat, perditionis, aut diminutionis statu, aut vestigialium, tum demum fœdera rata & sancta, & tanquam Iuramento STYX confirmata censeri possint: cum metus subsit interdicti illius & Suspensionis à Convivijs Deorum; sub quo nomine Imperij jura, & prærogativæ, & Affluentia & felicitas antiquis significantur.

## VI.

## PAN, sive Natura.

Fabula hæc in-  
venitur, in Li-  
bro secundo,  
De Augmentis  
Scientiarum,  
aucta & locu-  
pletata.

**A**ntiqui universam Naturam sub persona PANIS diligentissime descripsérunt; Hujus generationem in dubio relinquunt. Alij enim asserunt eum à Mercurio genitum; alij longè aliam generationis formam ei tribuunt; Aiunt enim Procos universos cum Penelope rem habuisse, ex quo promiscuo concubitu, PANIS communem filium ortum esse. Atque in hac posteriore narratione, procul dubio, aliqui ex recentioribus veteri fabulæ, nomen Penelopes impo- suere, quod & frequenter faciunt, cum narrationes antiquiores, ad personas & nomina juniora traducunt, idque quandóque absurdè & insulse; ut hic cernere est; Cum PANIS antiquissimus Dijs, & longè ante tempora Ulyssis fuerit, atque insuper Penelope ob matronalem castitatem Antiquitati venerabilis haberetur. Neque prætermittenda est tertia illa generationis explicatio: quidam enim prodiderunt eum Iovis, & Hybreos, id est, Contumeliae filium fuisse. Ut cuncte orto, Parcae illi sorores fuissè perhibentur. Effigies autem PANIS talis ab Antiquitate describitur: Cornutus, cornibus usque ad Cœlum fastigiatis, corpore toto hispidus, & villosus, barba imprimis promissa. Figura biformis, humana quo ad superiora, sed seminifera, & in Capræ pedes desinens. Gestabat autem Insignia Potestatis, lanistrā, Fistulam, ex septem calamis compactam; dextrâ Pedum, sive lignum, superius curvum, & inflexum; Induebatur autem Chlamide ex pelle Pardalis. Potestates ei & Munera hujusmodi attribuuntur, ut sit Deus venatorum, etiam pastorum, & in universum Ruricolarum; Præses item Montium: erat etiam proximus Mercurio Nuncius Deorum. Habebatur insuper Dux, & Imperator Nympharum, quæ circa eum perpetuò Chreas ducere, & tripudiare solebant: comitabantur & Satyri, & his seniores Sileni. Habebat etiam potestatem terrores immittendi præsertim inanes, & superstitiones, qui & Panici vocati sunt. Res gestæ autem eius non multæ memorantur: Illud præcipuum; quod Cupidinem provocavit ad luctam, à quo etiam in certamine victus est. Etiam Typhonem Gigantem retibus implicavit, & cohibuit: atque narrant insuper, cum Ceres moesta, & ob raptam Proserpinam indignata, se abscondisset, atque Di omnes ad eam investigandam magnopere incubuissent, & se per varias vias dispergiti essent, PANI solummodo ex fœlicitate quâdam contigisse, ut inter venandum eam inveniret, & indicaret. Ausus est quoque eum Apolline de victoriâ Musices decertare, atque etiam Myda judice prælatus est: ob quod Iudicium Mydas asininas aures tulit, sed clam, & secretò. Amores PANIS nulli referuntur, aut saltem admodum rari, quod mirum inter turbam Deorum prorsùs tam profuse amatoriam videri possit. Illud solummodo ei datur, quod Eccho adamaret, quæ etiam uxor ejus habita est, atque unam etiam Nymphaam

pham *Syringam* nomine, in quam propter iram, & vindictam *Cupidinis* (quem ad luctam provocare non reveritus esset) incensus est. Neque etiam prolem ullam suscepit (quod similiter mirum est, cum Dii præsertim Masculi prolifici admodum essent) nisi quod ei tribuatur tanquam filia, muliercula quædam *Ancilla IAMBÆ* nomine, qua ridiculis narratiunculis oblectare hospites solebat, ejusque proles ex conjugi *Echo* esse, à nonnullis existimabatur. Fabula nobilis, si quæ alia, atque naturæ arcanis & mysteriis gravida, & quasi distenta.

PAN (ut & nomen ipsum etiam sonat) Universitatem Rerum, sive Naturam repræsentat & proponit. De hujus origine, duplex omnino sententia est; atque adeò esse potest: aut enim à MERCURIO est, verbo scilicet divino, (quod & Sacrae literæ extra controversiam ponunt, & Philosophis iis, qui magis divini habitu sunt visum est;) aut ex confusis rerum seminibus. Qui enim unum rerum principium posuerunt, aut ad Deum illud retulerunt; aut si materiatum principium volunt, illud tamen potentia varium alleruerunt: adeò ut omnis hujusmodi controversia, ad illam distributionem reducatur, ut Mundus sit, vel à Mercurio, vel à Procis omnibus.

Namque canebat uti magnum per inane coacta  
Semina, terrarumque animæque Marisque fruissent  
Et liquidi simul ignis, & hiis exordia primis,  
Omnia & ipse tener Mundi concreverit orbis.

Tertia autem generatio Panis ejusmodi est, ut videantur Græci aliquid de Hebræorum Mysteriis, vel per Ægyptios internuncios, vel utcumque inaudivisse; pertinet enim ad statum Mundi non in meritis natalibus suis, sed post lapsum ADAMI, morti, & corruptioni expostum, & obnoxium factum. Ille enim status, Dei, & Peccati proles fuit, ac manet. Itaque triplex ista narratio de generatione PANIS, etiam vera videri possit, si ritè & rebus, & temporibus distinguatur: Nam iste PAN, quem intuemur, & contemplamur, ac nimio plus quam oportet colimus, ex verbo Divino, mediante Confusa Materiæ (quæ & ipsa à Deo creata erat,) & subintrante Prævaricatione, & Corruptione ortum habet. Naturæ rerum, Fata rerum, sorores ve- rè perhibentur & ponuntur; naturalium siquidem Caussarum Catenæ Ortus rerum, & Durationes, & Interitus, & Depressiones, & Eminen- tias, & Labores, & Felicitates, & Fata deniq; omnia, quæ rebus accide- re possunt, trahunt. Cornua autem Mundo attribuuntur. Quod vero Cornua hujusmodi ab imo latiora, ad verticem acuta sint. Id eò spe- ciat; Quod omnis rerum natura instar Pyramidis acuta sit: Indivi- dua enim infinita sunt: ea colliguntur in species, & ipsas multiplices: Species rursus insurgunt in genera, atque hæc quoque ascendendo in magis generalia contrahuntur, ut tandem natura tanquam in unum coire videatur. Neque mirum est PANIS cornua etiam Cœlum ferre; cum summitates naturæ sive Ideæ universales etiam ad divina quodam modo pertingant. Paratus enim, & propinquus est, transi- tus à Metaphysicæ ad Theologiam naturalem. Corpus autem Naturæ ele- gantissime

gantissimè, & verissimè depingitur Hirsutum, propter rerum Radios: Radii enim sunt tanquam Naturæ crines, sive villi, atque omnia ferè vel magis vel minus radiosæ sunt, quod in facultate visus manifestissimum est, nec minus in omni virtute & operatione ad distans: Quicquid enim operatur ad Distans, id etiam Radios emittere rectè dici potest, sed maximè omnium prominet *Barba PANIS*, quia Radii Corporum Cœlestium maximè ex longinquο operantur & penetrant. Quin & Sol, quando parte superiore ejus nube obvolutā, Radii inferiùs erumpunt, ad aspectum Barbatuſ certit. Etiam Corpus Naturæ rectissimè describitur Biforme, ob differentiam Corporum Superiorum, & Inferiorum. Illa enim ob pulchritudinem & motus æquabilitatem & constantiam, necnon Imperium in terram, & terrestria, meritò sub Humanâ figurâ repræsentantur: Hæc autem ob perturbationem, & motus incompositos, & quod à Cœlestibus regantur, Bruti animalis figurâ contenta esse possunt. Eadem Corporis descriptio pertinet ad participationem specierum. Nulla enim Natura simplex videri potest; sed tanquam ex duobus participans & concreta. Habet enim Homo nonnihil ex *Bruto*, Brutum nonnihil ex *Plantâ*, Planta nonnihil ex Corpore inanimato, omniaque reverà Biformia sunt, & ex Specie superiore, & inferiore compacta. Acutissima autem est Allegoria de Pedibus Capræ, propter motum ascensionis Corporum terrestrium versus Regiones Aeris & Cœli: Capra enim Animal scansorium est, eaque è rupibus pendere, atque in præcipitiis hærere amat; quod etiam res licet inferiori Globo destinatae, miris modis faciunt, ut in Nubibus & Meteōris manifestissimum est. Insignia autem in manibus PANIS duplia. Alterum Harmoniæ, alterum Imperii. Fistula enim ex septem Calamis, Concentum rerum, & Harmoniam, sive concordiam cum discordiâ mistam, quæ ex septem stellarum Errantium motu conficitur, evidenter ostendit. Pedum autem illud etiam nobilis translatio est; propter vias Naturæ partim Rectas, Partim obliquas. Præcipue autem Lignum, sive Virga, versus superiorem partem, curva est; quia omnia providentia divinæ opera in Mundo ferè per Ambages, & Circuitus fiunt; ut aliud agi videri possit, aliud interim reverà agatur; ut Josephi venditio in *Ægyptum*, & similia. Quinetiam in Regimine Humano omni prudentiore, qui ad gubernacula sedent, populo convenientia per prætextus & vias obliquas fœlicius quæ volunt, quam ex directo superinducunt, & insinuant; adeò ut omnis Imperii Virga sive Bacillum verè superiùs inflexum sit. Vestis PANIS & amiculum ingeniosè adinodum ex pelle PAR DALIS fuisse singitur; propter maculas ubique sparsas; Cœlum enim stellis, Maria Insulis, Tellus floribus consperguntur, atque etiam res particulares ferè variegatae esse solent circa superficiem, quæ veluti rei Chlamis est. Officium autem PANIS nullâ aliâ re tam ad vivum proponi, atque explicari potuerit, quam ut Deus venatorum sit: Omnis enim naturalis actio, atq; adeò motus & processus, nihil aliud quam venatio est. Nam & Scientiæ & Artes opera sua venantur, & Concilia humana fines suos, atq; res naturales omnes vel alimenta sua tanquam prædam, vel Voluptates suas tanquam solatium venantur, idque modis peritis & sagacibus.

Torva Leæna Lupum sequitur, Lupus ipse Capellam,  
Florentem Cythisum sequitur lasciva Capella.

Etiam Ruricolarum in genere PAN Deus est, quia hujusmodi homines magis secundum naturam vivant, cum in urbibus & Aulis natura cultu nimio corrumpatur; ut illud Poetæ amatorium verum sit.

— Pars minima est ipsa Puella sui.

Montium autem imprimis Praeses dicitur PAN, quia in Montibus & locis editis Natura rerum panditur, atque oculis & contemplationi magis subjicitur. Quod alter à Mercurio Deorum nuncius sit PAN, ea Allegoria planè divina est, cum proximè post verbum Dei, ipsa Mundi Imago, divinæ potentiae & sapientiae præconium sit. Quod & Poeta divinus cecinit. *Cœli enarrant Gloriam Dei, atque opera manus ejus indicat Firmamentum.* PAN autem oblectant Nymphæ, Animæ scilicet: Deliciae enim Mundi, Animæ viventium sunt: Ille autem meritò earum Imperator, cum illæ naturam quæque suam veluti Ducem sequantur, & circa eam cum infinitâ varietate, veluti singulæ more patrio saltent, & choreas ducant, motu neutiquam cessante: Unà perpetuò comitantur Satyri & Sileni; Senectus scilicet & Juventus; Omnia enim rerum est ætas quædam hilaris & saltatrix: atque rursus ætas tarda & bibula: Utriusque autem ætatis studia vere contemplanti (tanquam Democrito) fortassè ridicula, & deformia videntur, instar Satyri alicujus aut Sileni. De Panis autem terroribus prudentissima doctrina proponitur: Natura enim rerum omnibus viventibus indidit metum, ac formidinem vitae atque esertice suæ conservatricem, ac mala ingruentia vitantem & depellentem: veruntamen eadem Natura modum tenere nescia est; sed timoribus salutaribus semper vanos, & inanes admiscet, adeò ut omnia (si intus conspici darentur) Panis terroribus plenissima sint; præsertim humana; quæ superstitione (quæ verè nihil aliud, quam Panus terror est) in immensum laborant; maximè Temporibus duris, & trepidis & adversis. Quod verò attinet ad audaciam PANIS, & Pugnam per Provocationem cum Cupidine; id eò speditat, quia Materia non caret inclinatione & appetitu ad dissolutionem Mundi & recidivationem in illud Chaos antiquum, nisi prævalidâ rerum concordia (per Amorem, sive Cupidinem significatâ) malitia & impetus ejus cohiberetur & in ordinem compelleretur: Itaque bono admodum hominum & rerum fato fit, ut illud certamen PAN aduersum experiatur, & vixtus abscedat. Eodem prorsus pertinet, & illud de Typhone in retibus implicato; quia utcunque aliquando vasti, & insoliti rerum tumores sint (id quod Typhon sonat) sive intumescent maria, sive intumescent nubes, sive intumescat Terra, sive alia, tamen Rerum Natura hujusmodi corporum Exuperantias, atque Insolentias, Reti inextricabili implicat, & coercet, & veluti catena adamantine devincit. Quod autem Inventio Cereris huic Deo attribuitur, idque inter venationem; reliquis Diis negatur, licet sedulò quærentibus, & illud ipsum agentibus; monitum habet verum admodum & prudens; hoc est, ne rerum utilium, ad vitam & cultum

cultum Inventio qualis fuit segetum, a Philosophijs Abstractis, tanquam Dijs Majoribus, expectetur; licet totis viribus in illud ipsum incumbant, sed tantummodo à *Pane*, id est, Experientia sagaci & rerum Mundi notitiâ universali, quæ etiam casu quodam ac veluti inter venandum in hujusmodi inventa incidere solet. Illud autem Musices certamen, ejusque eventus, salutarem exhibit doctrinam, atque eam quæ rationi & Judicio humano gestienti, & se effarenti sobrietatis vincula injicere possit. Duplex enim videtur esse *Harmonia*, & *Quasi Musica*: altera Providentia Divinæ, altera Rationis Humanæ. Judicio enim humano, ac veluti auribus Mortaliū, Administratio Mundi & Rerum, & Judicia divina secretiora sonant aliquid durum, & quasi absonum: quæ inscitia licet Afininis auribus meritò insigniatur, tamen & ipsæ illæ aures secreto, nec palam gestantur: Neque enim hujusce rei deformitas à vulgo conspicitur, aut notatur. Postremò, minimè mirum est, si nulli Amores *Pani* attribuantur, præter conjugium Ecchus; Mundus enim seipso, atque in se rebus omnibus fruatur: qui amat autem, frui vult, neque in Copiâ, desiderio locus est. Itaque mundi Amores esse nulli possunt, nec potiendi Cupido, cum seipso contentus sit, nisi fortasse sermones: iij sunt Nympha, Echo, aut si accuratiōres sint, Syringa. Inter Sermones autem, sive voces, excellenter ad conjugium mundi sumitur sola Echo; Ea enim de mūni verâ est Philosophia, quæ mundi ipsius voces fidelissimè reddit, & veluti dictante mundo, conscripta est; & nihil aliud est quam ejusdem simulacrum & reflexio, neque addit quicquam de proprio, sed tantum iterat, & resonat. Ad mundi etiam Sufficiētiā & Perfectionem pertinet, quod prolem non edat. Ille enim per Partes generat, per Totum autem quomodo generare possit? cum Corpus extra ipsum non sit. Nam de Filiâ ejus Putativâ, mulierculâ illâ, est sanè ea adjectio quædam ad Fabulam sapientissimâ; per illam enim repræsentantur eæ, quæ perpetuis temporibus paſſim vagantur, atque omnia implet, vaniloquæ de rerum Naturâ Doctrinæ, re ipsâ infructuosæ, genere quasi subdititiae, garrulitate verò interdum jucundæ, interdum molestæ & importunæ.

## VII.

**PERSÆUS, sive Bellum.**

Fabula hæc  
invenitur, in  
Libro secundo,  
De Augmentis  
Scientiarum,  
aucta & locu-  
pletata.

**P**ERSEUS traditus fuisse à Pallade missus ad obtruncandam Medusam, quæ populis plurimis ad Occidentem in extremis Hibris partibus maximæ Calamitati fuit. Monstrum enim hoc tam dirum atque horrendum fuit, ut aspectu solo homines in saxa verte- ret. Erat autem è Gorgonibus una ac sola Mortalis Medusa; cum Passivæ reliquæ non essent. Itaque PERSEUS ad tam nobile facinus se comparans, arma, ac dona à tribus Dijs accepit: Talares alas à Mercurio,

Mercurio, à Plutone galeam, Scutum à Pallade, & speculum.  
 Neque tamen, licet tanto apparatu instructus, ad Medusam rectâ  
 perrexit, sed primum ad Græas divertit, Ex sorores ex alterâ paren-  
 te Gorgonibus erant. Atque Grææ istæ Canæ jam à Nativitate e-  
 rant, & tanquam vetulæ. Oculus autem ijs tantummodo & dens erat  
 omnibus unicus, quos prout exire foras quamque contigerat, vi-  
 cissim gestare, reversæ autem iterum deponere solebant: Hunc ita-  
 que oculum atque hunc dentem illæ P E R S E O commodarunt.  
 Tum demum cum se abundè ad destinata perficienda instructum  
 judicaret, ad Medusam properavit impiger & volans: Illam au-  
 tem dormientem offendit; Neque tamen aspectui ejus ( si evigila-  
 ret ) se committere audebat, sed Cervice reflexâ, in speculum  
 Palladis inspiciens atque hoc modo ictus dirigens, caput ei abscidit.  
 Ex sanguine autem Medusæ fuso, statim Pegasus alatus emicuit.  
 Caput autem abscissum PERSEUS in Scutum Palladis inseruit, cuī  
 etiamnum sua mansit vis, ut ad ejus intuitum omnes seu attoniti aut  
 syderati obrigerent. Fabula de Belligerandi ratione & prudentiâ  
 conficta videtur. Atque in ipsâ de bello suscipiendo, & de genere  
 belli eligendo deliberatione, tria proponit p्रcepta sana, & gra-  
 via, tanquam ex consilio Palladis. Primo ut de subjugatione Na-  
 tionum Finitarum quis non admodum laboret. Neque enim ea-  
 dem est patrimonij, & imperij amplificandi ratio. Nam in pos-  
 sessionibus privatis, vicinitas prædiorum spectatur: sed in propa-  
 gando imperio, Occasio & belli conficiendi facilitas, & fructus,  
 loco vicinitatis esse debent. Certè Romani, quo tempore Occi-  
 dentem versus, vix ultra Liguriam penetraverant, Orientis pro-  
 vincias usque ad Montem Taurum armis & imperio complexi sunt.  
 Itaque PERSEUS licet Orientalis, tamen longinquam expeditio-  
 nem, usque ad extrema Occidentis minimè detrectavit. Secundò  
 Curæ esse debet, ut justa & honorifica subsit belli causa: Id e-  
 min & alacritatem tum militibus, tum populis impensis conferentibus  
 addit: & Societas aperit, & conciliat, & plurimas denique com-  
 moditates habet. Nulla autem belli causa magis pia sit, quam de-  
 bellatio Tyrannidis, sub quâ populus succumbit, & prosternitur sine  
 animis & vigore, tanquam sub aspectu Medusæ. Tertiò prudenter  
 additur: quod cùm tres Gorgones fuerint ( per quas Bella re-  
 presentantur ) PERSEUS illam delegerit, quæ fuerit Mortalis;  
 hoc est, bellum ejus conditionis, quod confici, & ad exitum per-  
 duci posset, nec vastas, aut infinitas spes persecutus est. Instru-  
 ctio autem PERSEI ea est, quæ ad Bellum unicè confert, & for-  
 tunam ferè trahit. Accepit enim Celeritatem à MERCURIO, Oc-  
 cultationem Consiliorum ab ORCO, & Providentiam à PALLADE.  
 Neque caret Allegoriâ, eâque prudentissimâ, quod Alæ illæ Cele-  
 ritatis Talares, non Axillares fuerint, atque pedibus non hume-  
 ris additæ; quia non tam in primis belli aggressibus, quam in eis  
 quæ sequuntur, & primis subsidio sunt, Celeritas requiritur: Nul-  
 lus enim error in bellis magis frequens est, quam quod Prosecu-  
 tiones, & subsidiarij Impetus, Initiorum alacritati non respon-  
 dent. Etiam illa Providentiae Divisio ( Nam de galeâ PLUTO-  
 NIS,

NIS, quæ homines invisibles reddere solebat, Parabola manifesta est ) ingeniosa videtur de Scuto, & speculo : neque enim ea Providentia solum adhibenda est, quæ cavit instar Scuti, sed illa altera per quam hostium vires, & motus, & consilia cernuntur, instar speculi PALLADIS. Verum PERSEO utcunque copijs aut animis instructo, restat aliud quiddam maximū per omnia momenti antequam incipiatur bellum, nimirum ut divertat ad Græas. Grææ autem Proditiones sunt, Bellorum scilicet Sorores, non Germanæ illæ quidem, sed generis nobilitate quasi impares. Bella enim generosa, Proditiones degeneres & turpes. Earum descriptio elegans est, ut canæ à nativitate sint, & tanquam Vetus, propter perpetuas Proditorum Curas & Trepidationes : Earum autem vis ( antequam in manifestam defectionem erumpant ) aut in Oculo, aut in Dente est : Omnis enim Factio à statu quopiam alienata, & speculatur, & mordet : Atque hujusmodi Oculus & Dens tanquam Communis est. Nam quæ didicerunt, & neverunt, ferè per manus factionis ab uno ad alterum transeunt, & percurrunt. Et quod ad Dentem attinet, uno ferè ore mordent, & similem Cantilenam canunt, ut si unum audias, omnes audias. Itaque PERSEO conciliandæ sunt istæ Grææ, ut oculum, & dentem ei commodent : Oculum ad Indicia, dentem ad rumores serendos, & invidiam conflandam, & animos hominum solicitandos. His itaque dispositis, & præparatis, sequitur ipsa Belli actio. In eâ Medusam dormientem invénit : Prudens enim belli susceptor, semper ferè hostem assequitur imparatum & securitati propiorem : Atque nunc tandem speculo Palladis opus est. Plurimi enim ante ipsa pericula res hostium acutè & attentè intropicere possunt ; sed in ipso periculi articulo præcipuus est usus speculi, ut modus periculi cernatur, terror non offundatur : ( quod per illum intuitum capite averso significatur) A bello perfecto sequuntur effecta duo : Primùm PEGASI illa generatio & exuscitatio, quæ satis evidentè Formam denotat, quæ per omnia volat & victoriam celebrat : Secundum, Gestatio capitis Medusæ in scuto ; siquidem nullum præsidij genus huic ob præstantiam comparari possit. Unicum enim facinus insigne, & memorabile fœlicitè gestum, & perpetratum, omnes inimicorum motus cohibet, atque malevolentiam ipsam stupidam reddit.

*Endymion,*

## VIII.

*ENDYMION, sive  
Gratiosus.*

Astor ENDYMION traditur à *Luna* fuisse adamatus: novum autem, & singulare erat consuetudinis genus, siquidem ille decumbebat in nativâ quadam specu, sub saxis *Latmias*; *Luna* autem haud raro de Cœlo perhibetur descendisse, & sopiti Oscula petuisse, ac rursus in Cœlum se recepisse. Neque tamen otium istud, & somnus in detrimentum fortunarum ejus cedebat. Sed *Luna* interim effecit, ut pecus ejus pinguisceret admodum, ac numero etiam felicissimè auctum esset, ut nulli pastorum greges essent latiores, aut numerosiores. Fabula ad ingenia & mores Principum pertinere videtur. Illi enim cogitationum plehi, & in suspiciones propensi, non facilè ad consuetudinem vitæ interiorem recipiunt homines qui sunt perspicaces, & curiosi, & quasi animo vigilantes, sive exsomnes: sed potius eos, qui ingenio sunt quieto, & morigeri, & quod placitum est illis patiuntur, & nil ultrà inquirunt, sed se veluti ignaros & nil sentientes & quasi sopitos præbent; denique magis obsequium simplex, quam observantiam callidam præstant. Etenim cum hujusmodi hominibus Principes de Majestate suâ veluti *Luna* de Orbe superiore, descendere, et personam (quam perpetuò gerere instar Oneris cuiusdam sit) deponere, et familiariter versari libenter consueverunt, idque se tuto facere posse putant. Id quod in *Tiberio Cæsare* Principe omnium maximè difficiili, præcipue annotatum fuit: apud quem illi solummodo gratiosi erant, qui notitiam morum ejus revera habebant, sed pertinaciter, et quasi stupidè dissimulabant. Quod etiam *Ludovico* undecimo *Francorum Regi* Principi cautissimo, et callidissimo in moribus erat. Neque ineleganter in Fabulâ ponitur Antrum illud *Endymionis*: quia ferè usitatum est illis qui hujusmodi gratiâ apud Principes florent, habere secessus aliquos amœnos, quo illos invitent, ad otium et animi remissionem, absque Fortunæ suæ mole. Qui autem in hoc genere gratiosi sunt, plerunque rem suam benè agunt. Nam Principes licet fortasse ad honores eos non evehant, tamen cum vero affectu, nec propter utilitatem tantum illos diligent, munificentia suâ eos diligere consueverunt.

C. C.

SOROR

## IX.

## SOROR GYGANTUM, sive Fama.

**M**Emorant Poetæ, GYGANTES è terrâ procreatos, bellum Jovis, & superis intulisse, & fulmine disjectos & devictos fuisse. Terram autem Deorum irâ irritatam in vindictam natorum suorum, Famam progeniuisse; extremam *Gygentibus* sororem.

*Illam Terraparentis irâ irritata Deorum  
Extremam (ut perhibent) Cœo Enceladoque sororem,  
Progenuit. —*

Hujus Fabulæ ea sententia videtur esse : per *Terram*, Naturam vulgi significârunt, perpetuò tumidam & malignam versus Imperantes, & res novas parturientem : Hæc ipsa occasionem adepta, Rebelles parit & Seditiosos, qui Principes ausu nefario exturbare, & dejicere machinantur, quibus oppressis, eadem Plebis natura deterioribus favens, & tranquillitatis impatiens rumores gignit, & susurros malignos, & Famas querulas, & famosos libellos, & cætera id genus, ad invidiam eorum qui rebus præfunt ; ut Actiones Rebellium, & Famæ seditiones, genere, & stirpe non differant, sed veluti sexu tantum ; cum iste muliebres videantur, illæ viriles.

## X.

## ACTÆON Et PENTHEUS, sive Curiosus.

**C**uriostas humana in secretis rimandis, & eorum notitiâ appetitu malè fano concupiscendâ, & prensandâ, dupli exemplis pud antiquos coercetur : Altero *Actæonis*, altero *Penthei*. *Actæon* cum *Dianam* imprudens, & casu sine veste vidisset, in Cervum versus, à canibus quos alebat, dilaceratus est. *Pentheus* cum sacrificiorum *Bacchi* occultorum, consensâ arbore, spectator esse voluisse, furore percitus est. Fuit autem *Penthei* dementia ejus generis, ut res congerimasse existimaret, & duo Soles & rursùs duæ *Thebe* ei ob oculos versarentur; Adeò ut, cum *Thebas* properaret, statim alteris *Thebis* conspectis retraheretur : Atque hoc modo perpetuò & irrequietè fursum & deorsum ferretur.

*Eumenidum demens qualis videt agmina Pentheus,  
Et Solem geminum, & duplices se ostendere Thebas.*

Fabularum prima, ad secreta Principum ; secunda, ad secreta divina pertinere videtur. Qui enim Principibus non admitti, & præter eorum voluntatem secretorum consciî sunt, odium certissimum apud eos

eos consequuntur. Itaque gnari se peti, & occasiones captari, vitam degunt Cervorum more timidam & suspicionibus plenam. Quin & illud saepius accidit, ut à servis & domesticis in gratiam Principum, accusentur & subvertantur. Ubi enim Principis offensio manifesta est; quot servi, tot ferè Proditores esse consueverunt; ut *Actæonis* fatum illos maneat. Alia est *Penthei* calamitas. Qui enim ausu temerario, mortalitatis parùm memores, per excelsa Naturæ & Philosophiae fastigia (tanquam arbore consensâ) ad Mysteria divina aspirant, hiis pœna proposita est, perpetuæ inconstantia, & Judicii vacillantis & perplexi. Cùm enim aliud sit Lumen Naturæ, aliud divinum, ita cum illis fit, ac si duos Soles viderent. Cùmque actiones vitae, & decreta voluntatis ab intellectu pendeant: sequitur etiam ut non minùs voluntate, quām opinione hæsitent, nec sibi omnino constent: Itaque & duas *Thebas* similiter vident. Per *Thebas* enim actionum fines describuntur (cum *Thebis* *Pentheo* esset domus & perfugium.) Hinc fit, ut nesciant, quò se vertant, sed de summâ rerum incerti & fluctuantes, tantum subitis mentis impulsibus in singulis circumagantur.

## XI.

## ORPHEUS, sive Philosophia.

Fabula de ORPHEO vulgata, nec tamen interpretem fidum per Fomnia sortita, *Philosophiae* universæ imaginem referre videtur. Persona enim ORPHEI viri admirandi, & planè divini, & omnis harmoniæ periti, & modis suavibus cuncta vincentis, & trahentis, ad *Philosophiae* descriptionem facili transitu traducitur. Labores enim ORPHEI, Labores *Herculis*, quemadmodum opera Sapientiæ, opera Fortitudinis, dignitate & potentia superant. ORPHEUS ob amorem uxoris morte immaturâ præceptæ, fretus Lyrâ, ad Inferos descendere sibi in animum induxit, ut Manes deprecaretur; neque spe suâ decidit. Nam placatis manibus & delinitis, suavitate Cantus & Modulationibus, tantum apud eos potuit, ut ei uxorem secum abducere indulsum sit: Eâ tamen lege, ut illa eum à tergo sequeretur, ipse autem antequam ad luminis oras perventum esset, ne respiceret. Quod cùm ille nihilominus, amoris & curæ impatientia (postquam ferè in tuto esset) fecisset, rupta sunt foedera: atque illa ad inferos gradu præcipiti relapsa est. Ab illo tempore *Orpheus* mœstus, & mulierum osor, in solitudines profectus est, ubi eadem cantus, & Lyræ dulcedine, primò feras omnigenas ad se traxit, adeò ut naturâ suam exuentes, nec irarum aut ferocitatis memores, nec libidinis stimulis, & furoribus præcipites actæ, nec ingluviem satiare, aut prædæ inhiare amplius curantes, in momen Theatri, illum circumstarent, benignæ & mansuetæ inter se factæ, & tantum Lyræ concentui aures præbentes. Neque is finis, sed tanta musicæ vis, & potentia fuit, ut etiam sylvas moveret, & lapides ipsos, ut illa quoq; se transferrent, & sedes suas circa eum, ordine & modo decenti ponerent. Hæc ei cum ad tempus fœliciter & magna cum admiratione cessissent; tandem *Thraciæ* mulieres stimulis Bacchi percitæ,

primò cornu raucum, & immane sonans inflarunt: Ex eo, propter strepitum, musicæ sonus amplius audiri non potuit: Tum demùm solutâ virtute, quæ ordinis, & societatis istius erat vinculum, turbari cœptum est, & feræ singulæ ad naturam suam redierunt, & se invicem ut priùs persecutæ sunt; neque lapides, aut sylvæ suis manfere locis: **ORPHEVS** autem ipse tandem à mulieribus furentibus discerptus est, & sparsus per agros; ob cujus mortis mœrorem, **Helicon** ( fluvius Mufis sacer ) aquas sub terram indignatus condidit, & per alia loca caput rursùs extulit. Sententia fabulæ ea videtur esse. Duplex est *Orphei Cantio*: Altera ad placandas Manes; Altera ad trahendas feras & sylvas. Prior ad naturalem Philosophiam, Posterior ad Moralem, & Civilem aptissimè refertur. Opus enim naturalis Philosophiæ longè nobilissimum, est ipsa restitutio, & instauratio rerum corruptibilium, & ( hujuscerei tanquam gradus minores ) corporum in statu suo conservatio, & dissolutionis & putredinis retardatio. Hoc si omnino fieri detur, certè non aliter effici potest, quam per debita & exquisita Naturæ temperamenta, tanquam per Harmoniam lyræ, & modos accuratos. Et tamen cùm sit res omnium maximè ardua, effectu plerunque frustratur; Idque (ut verisimile est) non magis aliam ob caussam, quam per curiosam, & intempestivam sedulitatem & impatientiam. Itaque *Philosophia*, tantæ rei ferè impar; atque idcirco meritò mœsta, verit se ad res humanas, & in animos hominum, suau & eloquentiâ, virtutis, & æquitatis, & pacis amorem insinuans populorum cœtus in unum coire facit; & juga legum accipere, & imperijs se submittere, & affectuum indomitorum oblivisci, dum præceptis, & disciplinæ auscultant, & obtemperant: unde paulò post Ædificia extruuntur, Oppida conduntur, Agri & Horti Arboribus conseruntur; ut lapides, & sylvas non abs re convocari & transferri dictum sit. Atque ista rerum Civilium cura, ritè atque ordine ponitur post experimentum corporis mortalis restituendi sedulò tentatum, & ad extremum frustratum: Quia mortis necessitas inevitabilis evidenter proposita, hominibus ad æternitatem, meritis, & nominis famâ querendam, animos addit. Etiam prudentè in Fabulâ additur, **ORPHEVM** à mulieribus, & nuptijs alieno animo fuisse, quia nuptiarum delinimenta, & liberorum charitates, homines plerunque à magnis, & excelsis erga respuplicas meritis avertunt, dum immortalitatem propagine, non factis, assequi satis habent. Verùm & ipsa sapientiæ opera, licet inter humana excellant, tamen & suis periodis clauduntur. Evenit enim, ut postquam regna, & respuplicæ ad tempus floruerint, subinde perturbationes, & seditiones & bella oriantur; inter quorum strepitus, primò leges conticescunt, & homines ad naturæ suæ depravationes redeunt; atque etiam in agris, atque oppidis vastitas conspicitur. Neque ita multò post ( si hujusmodi furores continentur ) literæ etiam, & *Philosophia* certissimè discerpitur: adeo ut fragmenta tantum ejus, in paucis locis, tanquam Naufragij Tabulæ, inveniantur, & barbara tempora ingruant; **Heliconis** aquis sub terra mersis; donec debitâ rebus vicissitudine, non ijsdem fortasse locis, sed apud alias Nationes erumpant, et emanent.

## XII.

## Cœlum, sive Origines:

Tradunt Poëtæ Cœlum antiquissimum Deorum extitisse; Huius partes generationis à filio *Saturno* falce demeras fuisse. *Saturnum* autem sobolem numerosam generasse: sed filios continuò devorasse: tandem verò *Jovem* exitium effugisse, et adultum, patrem *Saturnum* in Tartarum detrusisse, et regnum accepisse; quinetiam patris genitalia cādem falce, quā ille Cœlum execuerat, abscidisse, atque in mare projecisse, inde Venerem natam esse. Postea verò Jovis regnum vix confirmatum, duo memorabilia bella exceperisse. Primum *Titanum*, in quibus debellandis Solis operam (qui solus ex *Titanibus Iovis* rebus favebat) egregiam fuisse: secundum *Gyantum*, qui et ipsi fulmine et *Iovis* armis disiecti sunt; quibus domitis, *Jovem* securum regnasse. Fabula videtur Ænigma de Origine rerum non multūm discrepans ab ea Philosophia, quam poste à *Democritus* amplexus est. Qui aperi-  
tissimè omnium æternitatem Materiæ asseruit, æternitatem mundi ne-  
gavit; in quo aliquantò propriùs ad veritatem verbi divini accessit,  
cuius narratio Materiam informem ante opera Dierum statuit. Sen-  
tentia Fabulæ hujusmodi est. *Cœlum* esse concavum illud, sive ambi-  
tum, quod Materiam complectitur. *Saturnum* autem Materiam ipsam,  
quæ omnem generandi vim parenti præscidit. Summam enim Mate-  
riæ perpetuò eandem esse; neque ipsum Quantum Naturæ cres-  
cere, aut minui. Agitationes autem, et motus Materiæ, primò im-  
perfectas, et malè cohærentes rerum compages produxisse, et velu-  
titamenta mundorum: Dein ævi processu Fabricam ortam esse,  
quæ formam suam tueri et conservare posset. Itaque priorem ævi di-  
stributionem per regnum Saturni significari, qui ob frequentes rerum  
dissolutiones, et breves durationes, Filiorum suorum Devorator ha-  
bitus est: Secundam autem per regnum *Iovis*, qui continuas istas,  
et transitorias mutationes in Tartarum detrusit; qui locus pertur-  
bationem significat. Is locus videtur esse spatium inter ima Cœli et  
interiora Terræ medium; quo intervallo perturbatio et fragilitas  
et mortalitas sive corruptio maximè versatur. Atque durante priore  
illâ generatione rerum, quæ sub regno Saturni tenuit, Venerem na-  
tam non fuisse. Donec enim in universitate Materiæ, discordia esset  
concordiâ potior et valentior, mutatio per Totum necessariò facta est,  
atque in ipsâ Fabricâ integrali. Tales verò Generationes Rerum  
extiterunt, antequam *Saturnus* exectus esset. Hunc verò generatio-  
nis modum cessante, alter ille modus continuò exceptit, qui per  
Venerem fit: adultâ et prævalidâ rerum concordiâ; ut mutatio tan-  
tum per partes procedat, integrâ et inconcusâ Fabricâ universali:  
*Saturnum* tamen detrusum, et deturbatum, non peremptum et ex-  
tinctum narrant, quia mundum in antiquam confusionem, et inter-

regna relabi posse, opinio Democriti erat : quod *Lucretius* ne suis temporibus eveniret deprecatus est.

*Quod procul à nobis, flectat Fortuna gubernans,  
Et ratio potius, quam res persuadeat ipsa.*

Postquam autem mundus mole, & vi suâ consisteret, tamen otium ab initio non fuisse. Nam secutos primùm in cœlestibus Regionibus motus notabiles, qui virtute Solis in Cœlestibus prædominante, ita sopiti sunt, ut mundi status conservaretur : Postea similiter in inferioribus ; per inundationes, tempestates, ventos, terræ motus magis universales, quibus etiam oppressis, & dissipatis, magis pacata, ac durabilis rerum conspiratio, & tranquillitas accrevit. Verùm de istâ Fabulâ utrumque pronunciari potest, & Fabulam *Philosophiam* continere, & Philosophiam rursus *Fabulam*. Novimus enim ( ex fide ) hæc omnia nil aliud esse, quam sensus jampridem cessantia & deficientia Oracula : Cum mundi, & Materia, & Fabrica ad Creatorem verissimè referatur.

### XIII.

## PROTEVS, sive Materia.

**N**arrant Poëta PROTEVM *Neptuno* pastorem fuisse ; eundemque Senem, & Vatem ; Vatem scilicet præstantissimum & veluti Ter-maximum. Noverat enim non futura solummodo, sed & Præterita & Præsentia, adeò ut præter Divinationem, etiam omnis Antiquitatis, & omniū Secretorum Nuncius ac Interpres esset. Morabatur autem sub ingenti specu. Ibi ei mos erat sub meridiem gem suum Phocarum numerare, atque deinde somno se dare. Qui autem operâ ejus aliquâ in re, uti volebat, is non alio modo apud eum valere poterat, nisi eum manicis comprehensum vinclis constringeret. Ille contrâ, ut se liberaret, in omnes formas, atque rerum miracula, ignem, lympham, feras se vertere solebat ; donec tandem in pristinam formam restitueretur. Sensus Fabulæ ad abdita Naturâ, & Conditiones Materiæ pertinere videtur. Sub PROTEI enim personâ Materia significatur omnium rerum post Deum antiquissima. Materia autem sub Cœli Concavo tanquam sub Specu habitat. *Neptuni* autem mancipium est, quia omnis Materiæ operatio & dispensatio in liquidis præcipue exercetur. Pecus autem sive Grex PROTEI, non aliud videtur esse, quam Species ordinariæ Animalium, Plantarum, Metallorum, in quibus Materia videtur se diffundere, & quasi consumere ; adeo ut postquam istas species effinxerit, & absolverit ( tanquam penso completo ) dormire & quiescere videatur, nec alias amplius Species moliri, tentare, aut parare. Atque hæc est PROTEI Pecoris numeratio, & subinde Somnus. Hoc autem sub Meridiem, non auroram, & vesperum fieri dicitur, id est, cum Tempus jam venit,

nerit, quod speciebus ex Materiâ debitè præparati, & prædispositâ perficiendis, & excludendis maturum sit, & quasi legitimum, & inter Rudimenta earum, & Declinationes medium; quod nos satis sci-  
mus ex Historiâ sacra sub tempore ipsius Creationis fuisse. Tum enim per virtutem illam divini verbi (*Producat*) Materiâ ad imperium Crea-  
toris, non per Ambages suas, sed subito confluxit, & Opus suum in  
Actum affatim perduxit, ac Species constituit. Atque hucusque Fa-  
bula narrationem suam de PROTEO libero, & soluto cum Pecore  
suo complet. Nam universitas rerum cum Structuris, & Fabricis  
Specierum ordinariis, est Materiæ non constrictæ, aut devinctæ, &  
gregis materiatorum facies. Nihilominus si quis peritus Naturæ  
Minister, vim adhibeat Materiæ, & Materiam vexet, atque urget,  
tanquam hoc ipso destinato, & proposito; ut illam in nihilum redi-  
git: illa contrâ (cum Annihilationo, aut interitus verus, nisi per Dei  
omnipotentiam fieri non possit) in tali necessitate posita in miras re-  
rum transformationes & effigies se vertit: adeò ut tandem veluti in  
orbem se mutet, & periodum impleat, & quasi se restituat, si vis con-  
tinuerit. Ejus autem constrictionis, seu alligationis ratio magis fa-  
ciliis erit, & expedita, si Materia per Manicas comprehendatur, id est,  
per Extremitates. Quod autem additur in Fabula *Proteum* Vatem  
fuisse, & trium temporum gnarum, id cum Materiæ naturâ optimè  
consentit. Necesse est enim, ut qui Materiæ passiones, & processus  
noverit, rerum Summam & earum quæ factæ sunt, & quæ fiunt, & quæ  
insuper futuræ sunt, comprehendat, licet ad partes et singularia cog-  
nitio non extendatur.

## XIV.

## MEMNON, sive Præmaturus.

**M**Emorant Poetæ MEMNONEM *Auroræ* filium fuisse. Ille ar-  
morum pulchritudine insignis, & aurâ populari celebris ad  
Bellum *Troianum* venit, & ad summâ ausu præcipiti festinans,  
& anhelans, cum Achille Græcorum fortissimo, certamen singulare  
init, atque ejus dextrâ occubuit. Hunc *Jupiter* miseratus aves lugu-  
bre quiddam & miserabile perpetuò quiritantes ad Exequias ejus &  
funeris decus excitavit; Ejusdem statua quoque *Solis* orientis radiis  
percussa, sonum flebilem edere solita fuisse perhibetur. Fabula ad  
Adolescentium summæ spei Calamitosos exitus pertinere videtur. Illi  
enim tanquam *Auroræ* filii sunt; atque inanum & externorum specie  
tumidi, majora ferè viribus audent, atque *Heroes* fortissimos laces-  
sunt, & in certamen depositunt, & impari congressu, succumbentes,  
extinguuntur; Horum autem mortem infinita commiseratio sequi  
solet: Nil enim inter Fata mortalium tam flebile est, tamque potens  
ad misericordiam commovendam, quam virtutis flos immaturo exitu  
præcisus. Neque enim prima ætas ad Satietatem scilicet, aut ad in-  
vidiam usque duravit, quam inœstiam in obitu lenire, aut misericor-  
diam

diam temperare possit; Quinetiam Lamentationes & planctus non solùm tanquam Aves illæ funebres circa rogos eorum volitant, sed & durat hujusmodi miseratio, & producitur: Maximè autem per Occasiones & Novos motus & Initia magnarum rerum, veluti per *Solen* radios Matutinos, Desideria eorum renovantur.

## XV.

**TYTHONUS, sive Satias.**

**E** Legans Fabula narratur de **TYTHONO**, eum ab *Aurorâ* adamatum fuisse, quæ perpetuam ejus consuetudinem exoptans, à *Jove* petiit, ut **TYTHONUS** nunquam mori posset: verum incuria muliebri oblita est petitioni suæ & illud inferere, ut nec senectute gravaretur. Itaque moriendi conditio ei erecta est, senium autem secutum est mirum & miserandum, quale consentaneum est evenire ei, cui mors negatur, ætas perpetuò ingravescit. Adeò ut *Jupiter* hujusmodi sortem miseratus, tandem eum in Cicadam converterit. Hæc Fabula ingeniosa adumbratio & descriptio voluptatis esse videtur; quæ à principio velut sub tempore *Auroræ*, adeò grata est, ut homines vota faciant, ut gaudia hujusmodi sibi perpetua, & propria sint, oblitis Saetatem & tedium eorum instar Senii, ipsis non cogitantibus, obventura. Adeò ut ad extremum, cum actiones voluptariæ homines deserant, cupido verò & affectus non moriantur, fieri soleat, ut homines sermonibus tantum, & commemorationibus earum rerum, quæ eis integrâ ætate voluptati fuerunt, se oblectent. Quod in Libidinosis, & viris Militaribus fieri videmus, cum illi impudicos sermones, huius fascinera sua retractent, Cicadarum more, quarum vigor tantum in voce est.

## XVI.

**PROCUS IUNONIS, sive Dedecus.**

**N**Arrant Poetæ *JOVEM*, ut amoribus suis potiretur, multas & varias formas sumpsisse, Tauri, Aquilæ, Cygni, Imbris aurei; cum autem *JUNONEM* sollicitaret, vertisse se in formam maximè ignobilem, atque contemptui & ludibrio expositam. Ea fuit miseri Cuculi, imbre & tempestate madefacti, & attoniti, tremebundi & semimortui. Prudens Fabula est, & ex intimis moribus desumpta. Sensus verò talis, Ne homines nimium sibi placeant, existimantes virtutis suæ specimen, eos apud omnes in pretio, & gratiâ ponere posse. Id enim succedere pro naturâ, & moribus eorum, quos ambiunt, & colunt, qui si homines sunt, nullis ipsis dotibus, & ornamenti insigniti; sed tantum ingenio sunt superbo et maligno (id quod sub

sub figurâ JUNONIS repræsentatur) tum vèrò nôrint sibi exuendam prorsùs esse omnem personam, quæ vel minimum prä se ferat decoris, et dignitatis: atque despere se planè, si aliâ viâ insistant; neq; satis esse si obsequii deformitatem prästant, nisi omnino se in personam abjectam et degenerem mutent.

## XVII.

**Cupido, sive Atomus.**

**Q**uæ de CUPIDINE sive Amore dicta sunt à Poetis; in eandem personam propriè convenire non possunt: Ita tamen discrepant, ut confusio personarum rejiciatur, similitudo recipiatur. Narrant itaque Amorem omnium Deorum fuisse antiquissimum, atque adeò omnium Rerum, Excepto *Chao*, quod ei coævum perhibetur; *Chaos* autem à priscis viris nunquam divino honore, aut nomine Dei insignitur. Atque Amor ille prorsùs sine Parente introducitur; nisi quod à nonnullis Ovum noctis fuisse traditur. Ipse autem ex *Chao*, & Deos, & Res universas progenuit: Ejus autem Attributa ponuntur Numero quatuor, ut sit infans perpetuus, Cœcus, Nudus, Sagittarius; fuit & Amor quidam alter, Deorum natu Minimus; *Veneris* filius; in quem etiam Antiquioris Attributa transferuntur; & quodam modo competunt. Fabula ad Cunabula Naturæ pertinet, & penetrat. Amor iste videtur esse Appetitus, sive stimulus Materiæ primæ, sive (ut explicatiùs loquamur) *Motus naturalis Atomij*. Hæc enim est illa vis antiquissima, & unica, quæ ex Materiâ omnia cōstituit & effingit. Ea omnino sine Parente est; id est, sine caussâ. Causia enim effectus veluti Parens est: Hujus autem virtutis caussa nulla potest esse in Naturâ (Deum enim semper excipimus.) Nihil enim hâc ipsâ prius; itaque Efficiens nulla: neque aliquid Naturæ Notius; ergo nec Genus, nec Forma; Quamobrem quæcunque ea tandem sit, positiva est & surda. Atque etiam si Modus ejus, & Processus sciri daretur; tamen per causam sciri non potest; cùm sit post Deum caussa causarum, ipsa incaussabilis. Neque fortassè Modum ejus intra inquisitionem humanam fisti, aut comprehendendi posse sperandum est; Itaque meritò fingitur Ovum à Nocte exclusum; Certè Sanctus Philosophus ita prenunciat. *Cuncta fecit pulchra tempestatibus suis, & Mundum tradidit disputationibus eorum, ita tamen ut non inveniat Homo, Opus quod operatus est Deus à principio, usque ad finem.* Lex enim summaria Naturæ, sive virtus istius *Cupidinis*, indita primis rerum particulis à Deo ad Coitionem, ex cuius répetitione, & multiplicatione omnis rerum varietas emergit & conflatur; cogitationem mortalium perstringere potest, subire vix potest. Philosophia autem Græco-  
rum invenitur in Rerum Materiatis principiis investigandis magis acuta, & sollicita; in Principiis autem Motus, (in quibus omnis operationis vigor consistit) negligens & languida. In hoc autem, de quo agimus prorsùs cæcutire & balbutire videtur: Etenim *Peripateticorum*

corum opinio; de *stimulo Materiae*, per *Privationem*; ferè non ultra verba tendit, & rem potius sonat, quam signat; Qui autem hoc ad Deum referunt; optimè illi quidem, sed saltu, non gradu ascendunt: Est enim procul dubio unica, & summaria *Lex* in quam natura coit, Deo substituta: Ea ipsa, quæ in superiore textu, illo verborum complexu demonstratur. *Opus, quod operatus est Deus, à Principio, usque ad Finem.* Democritus autem, qui altius rem perpendit, postquam *Atomum* dimensione nonnullâ, & figurâ instruxerat, unicum Cupidinem sive Motum primum ei attribuit simpliciter, & ex comparatione alterum. Omnia enim ad Centrum Mundi ferri putavit propriè, quod autem plus materiæ habet, cum celerius ad Centrum feratur, illud quod minus habet percussione summovere, & in contrarium pellere. Verùm ista meditatio angusta fuit; & ad pauciora, quàm par erat respiciens. Neque enim aut corporum cœlestium in orbem Conversio, aut rerum Contractions, & Expansiones ad hoc Principium reduci, aut accommodari posse videntur. Epicuri autem opinio de Declinatione Atomi, & Agitatione fortuitâ, ad nugas rursus, & ignorationem rei lapsa est. Itaque nimis plus, quàm optaremus illud apparet: istum Cupidinem Nocte involvi. Itaque de Attributis videamus; Elegantissimè describitur *Cupido Infans, Pusillus, & Perpetuus*; composita enim grandiora sunt, & aetatem patiuntur; prima autem rerum semina, sive Atomi, Minutisunt, & in perpetuâ Infantiâ permanent: Etiam illud verissimè, quod Nudus: cum composita universa recte cogitanti Personata, & induita sint; Nihilque propriè Nudum sit praeter primas rerum particulæ. Illa autem de Cœcitate *Cupidinis* sapientissima Allegoria est. Iste enim *Cupido* (qualiscunque is sit) minimum videtur habere providentia; sed secundum illud, quod proximum sentit, gressum & motum suum dirigere; ut Cœci palpando solent; quo magis admirabilis est Providentia illa summa divina, quia ex rebus providentiâ maximè vacuis, & expertibus, & quasi Cœcis, certâ tamen, & fatali lege istum ordinem & pulchritudinem rerum educit. Ultimum Attributum ponitur, quod Sagittarius sit, hoc est, quod ista virtus talis sit, ut operetur ad distans. Quod enim ad Distans operatur, tanquam Sagittam emittere, videtur: quisquis autem Atomum afferit, atque vacuum, (licet istud vacuum intermisum ponat, non segregatum;) necessariò virtutem Atomi ad Distans introducit: Neque enim hæc demâ, aliquis motus, (propter vacuum interpositum) excitari posset, sed omnia torperent, & Immobilia manerent; Quod autem ad Iuniorem illum Cupidinem attinet, merito ut minimus Deorum natu traditur, Cum non ante Species constitutas vigere potuisset. In illius autem descriptione Allegoria ad mores deflectit, & traducitur. Subest tamen quædam ejus cum illo Antiquo conformitas. VENVS enim generaliter affectum conjunctionis, & procreationis excitat; CUPIDO ejus Filius, Affectum ad individuum applicat. Itaque à Venere est generalis dispositio, à Cupidine magis exacta Sympathia: Atque illa à causis magis propinquis pendet; hæc autem à principiis magis altis & fatalibus, & tanquam ab antiquo illo Cupidine, à quo omnis exquisita Sympathia pendet.

## XVIII.

## DIOMEDES, sive Zelus.

DIOMEDES cum magnâ & eximiâ gloriâ floreret, & Palladi percharus esset, exstimulatus ab eâ est, (& ipse promptior quam oportebat) ut si fortè *Veneri* in pugnâ occurseret, illi neutiquam parceret; quod & ille audacter executus est, & *Veneris* dextram vulneravit. Hoc facinus ille ad tempus impunè tulit, & rebus gestis claus & inclytus in patriam rediit, ubi domestica mala expertus, ad exteros in Italiam profugit. Ibi quoque initia satis prospera habuit, & Regis *Dauni* hospitio, & donis cultus, & ornatus est, & multæ illi statuae per eam Regionem extructæ. Sed sub primam Calamitatem, quæ populum ad quem diverterat affixit, statim subiit *Dannum* cogitatio, se intra penates suos duxisse hominem impium, & Diis invisum, & Theomachum, qui Deam, quam vel tangere religio erat, ferro invaserat, & violaverat. Itaque ut patriam suam piaculo obstrictam liberaret, nihil hospitii jura reveritus, cum ei jus religionis videretur antiquius DIOMEDEM subito obtruncat; statuas & honores ejus prosterni & aboleri jubet. Neque hujusmodi gravem casum vel miserari tutum erat; sed & ipsi Comites ejus, cum mortem Dueis sui lugerent, & questibus omnia implerent, in Aves quasdam ex genere Olorum mutati sunt, qui & ipsi sub mortem suam quiddam dulce & lugubre sonant. Habet hæc Fabula subjectum rarum, & ferè singulare. Neque enim memoriæ proditum est, in aliquâ alia Fabulâ, *Herodem* ullum præter unum DIOMEDEM ferro violasse aliquem ex Diis. Atque certè videtur fabula imaginem in illo depinxisse Hominis, & Fortunæ ejus, qui ex professo hunc finem actionum suarum sibi proponit, & destinat, ut cultum aliquem divinum, sive Sectam Religionis licet vanam & levem, vi & ferro insectetur & debellet. Quamquam enim cruenta religionis dissidia veteribus incognita essent; (cum Dii Ethnici Zelotypiâ, quod est Dei veri Attributum, non tangerentur,) tamen tanta, & tam lata videtur fuisse prisci sæculi sapientia, ut quæ experiundo non nosset, tamen meditatione, & simulachris comprehendenderent. Qui itaque Sectam aliquam Religionis licet vanam, & corruptam, & infamem (id quod sub persona Veteris significatur) non vi rationis, & doctrinæ, & sanctitate vitae, atq; exemplorum & autoritatum pondere, corrigere & convincere; sed ferro &flammâ, & poenarum acerbitate exscindere, & exterminare intunduntur; incenduntur fortasse ad hoc ipsum à Pallade; id est, Prudenter quâdam acri, & judicii severitate, quarum vigore & efficaciâ, hujusmodi errorum fallacias, & commenta penitus introspicunt: & ab odio pravitatis, & zelo bono; & ad tempus ferè magnam gloriam adipiscuntur, atq; à vulgo (cui nihil moderatum, gratum esse potest) ut unici veritatis, & religionis vindices, (cum cæteri tepidi videantur & meticulosi,) celebrantur, & ferè adorantur. Attamen hæc gloria,

&amp;

& fœlicitas raro ad exitum durat: sed omnis ferè violentia, nisi morte celeri vicissitudines rerum effugiat, sub finem improspera est. Quod si eveniat, ut rerum commutatio fiat, & Secta illa proscripta, & depressa vires acquirat, & insurgat, Tum verò hujusmodi hominum zeli, & contentiones damnantur, & nomen ipsum odio est, & omnes honores eorum in opprobrium desinunt: Quod autem ab hospite interfectus est DIOMEDES; id eò spectat, quod religionis dissidium, etiam inter conjunctissimos, insidias & prodiciones excitet; Illud verò de Luctu ipso, & querimoniis minimè toleratis, sed supplicio affectis, hujusmodi est, ut moneat, in omni ferè scelere, miserationi hominum locum esse, ut etiam qui crimina oderunt, personas tamen & calamitates reorum, humanitatis causâ commiserentur; extremum autem malorum esse, si misericordiae commercia interdicantur. Atque tamen in causâ religionis, & impietatis, etiam miserationes hominum notari, & suspectas esse. Contra verò Comitum DIOMEDIS, id est, hominum, qui ejusdem sunt Sectæ, & opinionis, querimonia, et deplorationes argutæ admodum et CANORÆ esse solent, instar Olorum, aut Avium DIOMEDIS; In quo etiam illa pars Allegoriæ nobilis est, et insignis; Eorum qui propter causam religionis suppicia subeunt, voces sub tempus mortis, tanquam Cygneas cantiones animos hominum mirum in modum flectere, et in memoriis et sensibus eorum diutissimè inhærere, et permanere.

## XIX.

*DAEDALUS, sive Mechanicus.*

**S**apientiam atque industriam Mechanicam, atque in illâ Artificia Sillicita, et ad pravos usus detorta, Antiqui adumbraverunt sub persona DÆDALI, viri ingeniosissimi, sed execrabilis: Hic ob condiscipulum, et æmulum occisum exulaverat, gratus tamen in exilio Regibus, & civitatibus erat. Atque multa quidem egregia opera tam in honorem Deorum, quam ad exornationem, et magnificenciam urbium, et Locorum publicorum extruxerat, et effinxerat; sed tamen Nomen ejus maximè celebratur ob illicita. Fabricam enim Libidini Pasiphaes subministravit, ut cum Tauro misceretur; adeo ut ab hujus viri sceleratâ industriâ, et ingenio perniciose Monstrum illud Minotaurus pubem ingenuam dévorans ortum traxerit infâciam ac infamem. Atque ille malum malo tegens et cumulans, ad securitatem hujus pestis, Labyrinthum excogitavit, et extruxit: Opus fine et detestatione nefarium, artificio insigne et præclarum; Ac postea rursus, ne malis artibus tantum innesceret, atque ut scelerum remedia (non solum instrumenta) ab eodem peterentur; etiam Consilii ingeniosi author erat de filo, per quod errores Labyrinthi retexerentur. Hanc DÆDALUM Minos magnâ cum severitate atque diligentia, et inquisitione persecutus est; Ille tamen semper et perfugia et effugia reperiebat. Postremò cum volandi peritiam filium Icarum edocuisse,

edocuisse, ille Novitus, & artem ostentans, à Cœlo in aquam decedit. Parabola videtur esse ejusmodi. In ipso introitu ejus, ea quæ apud excellentes Artifices excubat, & miris modis dominatur, Invicta notatur: Nullum enim gentis hominum ex Invidiâ eâque acerbâ, & tanquam internecivâ magis laborat. Accedit Nota de genere pœnæ inficto minùs politice & providè: ut *Dædalus* exulet. Etenim Opifices præclari id habent, ut apud omnes ferè populos sint acceptissimi; adeò ut Exilium præstanti Artifici vix supplicii loco sit. Nam aliae vitæ conditiones, & genera, extra patriam non facilè florere possunt. Artificum autem admiratio, propagatur, & augetur apud exterios, & peregrinos, cùm insitum animis hominum sit illud, ut populares suos, quoad opificia *Mechanica* in minori pretio habeant. De usu autem Artium *Mechanicarum*, quæ sequuntur manifesta sunt; multum enim illis debet vita humana, cùm plurima & ad Religionis apparatus, & ad Civilium decus, & ad universæ vitæ culturam, ex illarum thesauris collata sint. Veruntamen ex eodem fonte emanant instrumenta Libidinis, atque etiam instrumenta Mortis. Missâ enim Arte Lenonum, venena quæsitissima, atque tormenta bellica, atque hujusmodi pestes, (quæ *Mechanicis* inventis debentur) probè novimus, quantum *Minotaurum* ipsum sævitiâ, & pernicie superarint. Pulcherrima autem Allegoria est, de Labyrintho, quâ Natura generalis Mechanicæ adumbratur. Omnia enim *Mechanica*, quæ magis sunt ingeniosa, & accurata, instar Labyrinthi censerî possint; propter subtilitatem & variam implicationem, & obviam similitudinem, quæ vix ullo judicio, sed tantum experientiæ filo regi & discriminari possunt. Nec minus aptè adjicitur, quod idem ille, qui Labyrinthi Errorès inventit, etiam fili commoditatem monstravit; Sunt enim Artes Mechanicae, veluti usus ambigui, atque faciunt & ad nocumentum, & ad remedium, & ferè virtus earum seipsum solvit & retexit. Articia autem illicita, atque adeò Artes ipsas sæpius persequitur *Minos*; hoc est, Leges, quæ illas damnant, & earum usum populis interdicunt. Nihilominus illæ occultantur, & retinentur, & ubique, & latebras & receptum habent, quod & benè notatum est in re non multum dissimili à Tacito suis temporibus de Mathematicis, & Genethliacis, *Genus* (inquit) *hominum*, quod in Civitate nostrâ semper, & retinebitur, & veterabitur. Et tamen Artes illicitæ, & Curiosæ cujuscunque generis tractu temporis, cùm ferè quæ polliceantur non præstant (tanquam *Icari* de Cœlo) de existimatione suâ decidunt, & in contemptum veniunt, & nimia ipsâ ostentatione pereunt. Et certè si verum omnino dicendum est, non tam fœliciter Legum frœnis coercentur, quam coarguntur ex vanitate propriâ.

**D d ERICHTONIUS,**

## XX.

**ERICTHONIUS, sive Impostura.**

**F**abulantur Poetæ **VULCANUM** pudicitiam **Minervæ** sollicitasse, atque subinde cupidine incensum, vim adhibuisse, atque in ipsa Luctâ semen in terram effudisse, ex quo **ERYCTHONIUM** natum esse, qui (partes superiores) decorâ & gratâ erat corporis compage, Femora autem & Tibiæ suberant in anguillæ similitudinem, exilia & deformia : Cujus deformitatis cùm ipse sibi conscius esset, eum primum curruum usum invenisse, ut quod in corpore magnificentum erat, ostentaret, probrum autem tegeret. Hujus Fabulæ miræ, & prodigiosæ ea sententia esse videtur. Artem (quæ sub personâ *Vulcani* ob multiplicem ignis usum repræsentatur) quoties per corporum omnimas vexationes, Naturæ vim facere, eamque vincere ac subigere contendat, (Natura autem sub personâ *Minervæ*, ob operum soleritatem adumbratur) ad votum & finem destinatum raro pertingere ; sed tamen multâ machinatione & molitione (tanquam Luctâ) intercidere atque emitti generationes imperfectas, & opera quædam manca, asperitu speciosa, usu infirma, & claudicantia ; quæ tamen impostores multo & fallaci apparatu ostentant, & veluti triumphantes circumducunt. Qualia ferè, & inter Productiones Chymicas, & inter subtilitates & novitates Mechanicas sapientius notare licet ; præsertim cùm homines potius propositum urgentes, quam ab erroribus suis se recipientes, cum Naturâ colluctentur magis, quam debito obsequio & cultu ejus amplexus petant.

## XXI.

**DEUCALION, sive Restitutio.**

**N**arrant Poetæ extintis prorsus prisci orbis incolis per diluvium universale, Cùm soli restarent **DEUCALION** & **PYRRHNA**, qui ardebat desiderio pio, & inclyto instaurandi generis humani, eos hujusmodi Oraculum excepisse ; voti compotes futuros, si ossa Matris acciperent, & post se jacerent : quod illis primo magnam tristitiam, & desperationem incussit : Cum æquatâ rerum facie per diluvium, Sepulchri perscrutatio omnino res sine exitu esset ; sed tandem intellexerunt Lrides Terræ (cum *Tellus* omnium mater habeatur) ab Oraculo significari. Fabula Arcanum Naturæ, recludere videtur, & Errorem animo humano familiarem corrigere ; Hominis enim imperitia judicat rerum renovationes, sive instauraciones, ex ea runderem putredine & reliquiis (ut Phœnicen ex cinere propriâ suscitari

fuscitari posse, quod nullo modo convenit, Cum hujusmodi materiæ spatia sua confecerint & ad initia ipsarum rerum prorsùs ineptæ sint. Itaque retrocedendum ad principia magis communia.

## X X I.

## NEMESIS, sive Vices rerum.

**N**E<sup>M</sup>E<sup>S</sup>I<sup>S</sup> traditur fuisse Dea, omnibus veneranda, potentibus & fortunatis etiam metuenda: Ea Noctis & Oceani filia fuisse perhibetur. Effigies autem ejus describitur talis. Alata erat, etiam coronata; in manibus autem gestabat Dextrâ Hastam è fraxino, sinistrâ Phialam, in quâ inclusi erant Æthiopes: Insidebat autem Cervo. Parabola ejusmodi esse videtur; Nomen ipsum NE<sup>M</sup>E<sup>S</sup>I<sup>S</sup> Vindictam, sive Retributionem satis apertè significat; Hujus enim Deæ Officium, & Administratio in hoc sita erat, ut beatorum constanti, & perpetuæ fœlicitati instar Tribuni plebis intercederet; ac illud suum *Veto* interponeret; neq; solūm insolentiam castigaret, verum etiam rebus prosperis licet ianocentibus & moderatis, rerum adversarum vices rependeret; ac si neminem humanæ fortis ad Convivia Deorum admitti mos esset, nisi ad Ludibrium: Evidem cùm illud Capitulum apud C. Plinium perlego, in quo ille infortunia, & miseras Aug<sup>usti</sup> Cæsar<sup>is</sup> collegit, quem omnium hominum fortunatissimum existimabam, quique artem etiam quandam utendi fruendi fortunā habebat, ac cuius in animo nil tumidum, nil leve, nil molle, nil confusum, nil melancholicum, annotare licet (ut ille etiam sponte mortali aliquando destinasset) hanc Deam magnam & præpotentem esse judicavi, ad cuius aram talis victima tracta esset. Parentes hujus Deæ fuere Oceanus & Nox; Hoc est, Rerum vicissitudo, & Judicium divinum Obscurum, & Secretum; Etenim Vices rerum per Oceanum aptè representantur, ob perpetuum fluxum, & refluxum: Occulta autem Providentia, per Noctem titè proponitur. Nam etiam apud Ethnicos nocturna illa Nemesis, cùm scilicet judicium humanum à divino discors esset, in observatione erat.

— Cedit & Riphæus justissimus unus,  
Qui fuit ex Tencris & servantissimus equi.  
Diis aliter visum. —

Alata autem describitur Nemesis, ob subitas rerum conversiones, nec antè prævisas; Nam in omni rerum memoriâ illud ferè usavenit, ut homines magni, & prudentes per ea discrimina perierint, quæ maxime contempserint, Certè cùm M. Cicero, à Dec. Bruto de Octavii Caesaris minùs sincerâ fide, & animo exulcerato monitus esset; Illud tantum rescripsit, Te autem mi Brute situt debo amo, quod istud quicquid est magarum me scire voluisti. Etiam Coronâ Nemesis insignitur, ob naturam vulgi invidam & malignam: Quando enim fortunatî

nati & potentes rutint, tum ferè vulgus exultat, & Nemesis coronat. Hasta autem in Dextrâ ad eos pertinet, quos Nemesis actu percutit, & transfigit. Quos autem Calamitate & infortunio non mactat, illis tamen Spectrum illud atrum & infaustum in sinistrâ ostentat: observantur enim proculdubio mortalibus etiam in summo fastigio felicitatis positis, Mors & Morbi, & infortunia, & amicorum perfidiae, & inimicorum insidiæ, & rerum mutationes, & hujusmodi; veluti Æthiopes illi in phialâ; Certè Virgilius, Cum prælium Actiacum describit, de Cleopatrâ illud elegantè subjungit.

*Regina in mediis, patrio vocat agmina fistro,  
Nec dum etiam geminos à tergo respicit angues.*

Verum non multò post quocunque se illa verteret, tota agmina Æthiopum obversabantur. Ad extremum prudenter additur, Nemesis Cervo infidere, quia vivax admodum Animal est Cervus; Atque fieri fortasse potest, ut qui Juvenis fato ereptus sit, Nemesis prævertat & effugiat; Cui autem diurna obvenit fælicitas, & potentia, is proculdubio Nemesi subjicitur, ac veluti substernitur.

### XXIII.

## ACHELOUS, sive Prælium.

**N**arrant antiqui, Cum HERCULES & ACHELOUS de nuptiis Deianiræ contenderent, rem ad certamen deductam esse. Achelous autem, cùm varias & multiplices formas tentasset (nam hoc ei facere licebat) tandem Herculi sub formâ Tauri torvi, & frementis occurrit, & ad pugnam se paravit; Hercules verò, solitam retinens figuram humanam, in eum impetum fecit; Res cominus gesta est: Eventus autem talis fuit, ut Hercules alterum ex cornibus Tauro fregerit: ille majorem in modum dolens et perterritus, ut Cornu illud suum redimeret, permutatione factâ Cornu Amaltheæ, sive Copiæ, Herculi latus est. Fabula ad Belli expeditiones pertinet; Apparatus enim belli ex parte defensivâ (qui per Acheloum proponitur) varius admodum & multiformis est. Nam invadentis species unica est, et simplex, cum ex exercitu solo, aut classe fortasse constet, Regio autem quæ in solo proprio hostem expectat, infinita molitur, oppida munit, diruit, Plebem ex agris et villis, in urbes & castella cogit, pontes extruit, prosternit, copias et commeatus comparat, distribuit, in flaviis, portibus, Collium faucibus, sylvis et aliis rebus innumeris occupata est, ut novas rerum facies quotidiè induat, & experiatur, ac tandem cum abundè munita & instructa fuerit, Tauri pugnacis formam & minas ad vivum repræsentet. Ille autem qui invadit, prælium captat, & in hoc maximè incumbit, inopiam in Terrâ hostili metuens: Quod si fit, ut prælio commissio acie victor sit, & tanquam cornu hosti frangatur proculdubio illud assequitur, ut hostis trepidus & existimatione diminutus, ut se explicet, & vires suas reparet, in munitiona se recipiat;

piat; atque urbes et regiones victori ad populandum, et diripiendum relinquat; quod verè instar Cornu illius *Amaltheæ* censeri possit.

## XXXIII.

## Dionysus, sive Cupiditas.

**N**arrant *Semelen Iovis* pellicem, postquam Juramento eum in-  
violabili ad votum indefinitum obstrinxisset; petuisse ut ad am-  
plexus suos accederet talis, qualis cum *Junone* consuesset: Itaq;  
illa ex conflagratione periit. Infans autem, quem in utero gestabat  
à patre exceptus, in femur ejus insutus est, donec Menses factui desti-  
natos compleret; ex quo tamen onere *Jupiter* non nihil claudicabat:  
Itaque puer, quod *Iovem* dum in femore ejus portaretur, gravaret, et  
pungere, *Dionysi* nomen accepit. Postquam autem editus esset, a-  
pud *Proserpinam* per aliquot annos nutritus est; Cum verò adultus  
esset, ore terè muliebri conspiciebatur, ut sexus videretur tanquam  
ambigui: Etiam extinctus et sepultus erat ad tempus, et non ita mul-  
tò post revixit. Atque primâ Juventâ vitis culturam, atque adeò  
Vini confectionem, et usum primus invenit, et edocuit; ex quo cele-  
bris factus, et inclitus, orbem terrarum subjugavit, et ad ultimos In-  
dorum terminos perrexit: Curru autem vehebatur à Tigribus tra-  
cto: Circa eum subsultabant Dæmones deformes *Cobali* vocati, *A-  
eratus & alii*: Quin & Musæ comitatui ejus se addebant. Uxorem  
autem sibi summis *Ariadnen* à *Theseo* desertam, et relictam; Arbor ei  
sacra erat *Hædera*. Etiam sacrorum et ceremoniarum Inventor et In-  
stitutor habebatur, ejus tamen generis, quæ et fanaticæ erant, et plen-  
næ corruptelarum, atque insuper crudeles. Furores quoque immit-  
tendi potestatem habebat. Certè in Orgiis ejus à Mulieribus furore  
percitis, duo viri insignes discepti narrantur, *Pentheus & Orpheus*, ille  
dum arbore concensâ spectator eorum, quæ agerentur esse voluisset,  
hic cum lyram pulsaret. Atq; hujus Dei res gestæ cum *Jovis* rebus ferè  
confunduntur. Fabula videtur ad mores pertinere, ut nihil in Philoso-  
phiâ morali melius inveniatur. Describitur autem sub personâ *Bacchi*  
natura Cupiditatis sive affectus & perturbationis. Mater enim Cupidi-  
tatis omnis licet nocentissimæ, non alia est, quam Appetitus & Desi-  
derium Boni Apparentis: Concipitur verò semper Cupiditas in voto  
illicito, priùs temerè concessio, quam intellecto & judicato. Postquam  
autem affectus effervesce coepit, Mater ejus (natura scilicet Boni)  
ex nimio incendio destruitur, & perit: Cupiditas autem dum immatu-  
ri est, in animâ humanâ, (quæ ejus genitor est, & per *Jovem* repre-  
sentatur) et nutricatur, & occultatur, præcipue in animæ parte inferiore  
tanquam femore; atque animum pungit, et convellit, et deprimit;  
adeo ut decreta, et Actiones ex eâ impedianter, et claudicent. Atque  
etiam postquam consensu & habitu confirmata est, & in actus erumpit,  
tamen apud *Proserpinam* ad tempus educatur: id est, latebras quærit,  
atque clandestina est, et quasi subterranea, donec remotis pudoris, et  
metus

metus frænis, et coalitâ audacia, aut virtutis alicujus prætextum sumit, aut infamiam ipsam contemnit. Atque illud verissimum est, omnem affectum vehementiorem tanquam ambigu sexus esse. Habet enim impetum virilem, impotentiam autem muliebrem. Etiam illud præclarè, *Bacchum* mortuum reviviscere. Videntur enim Affectus quandoque sopiti, atque extinti, sed nulla fides habenda est eis, ne sepultis quidem; siquidem præbitâ materiâ, et occasione resurgunt. Atque de inventione vitis parabola prudens est: Omnis enim affectus ingeniosus est: et sagax ad investigandum fomites suos; Ante omnia autem, quæ hominibus innotuere, vinum ad perturbationes cuiuscunq; generis excitandas, et inflammandas potentissimum est, et maximè efficax; atque est eis, instar fomitis communis. Elegantissimè autem ponitur affectus provinciarum subjugator, et expeditionis infinitæ susceptor. Nunquam enim partis acquiescit, sed appetitu infinito neque satiabili ad ulteriora tendit, et novis inhiat; Etiam Tigres apud affectus stabulant et ad Currum Iugantur; Postquam enim affectus aliquis Curulis esse cœpit non pedestris, et victor rationis et Triumphator; in omnia quæ adversantur, aut se opponunt crudelis est et indomitus et immitis. Facetum autem est, quod circa Currum subsultant illi Dæmones ridiculi. Omnis enim affectus progignit Motus in oculis et ore ipso et gestu indecoros, et inconditos, subsultorios et deformes, adeò ut qui sibi in aliquo affectu, veluti Irâ, Insultatione, Amore, videatur magnificus et tumidus, aliis tamen sit turpis et ridiculus. Conspiciuntur etiam in affectus Comitatu Musæ. Neque enim reperitur ullus ferè affectus, cui, non blandiatur aliqua Doctrina. Hac enim in re ingeniorum indulgentia, Musarum Majestatem minuit, ut cum duces vitæ esse debeant, sint Affectuum pedissequæ. Atque imprimis nobilis est illa Allegoria. *Bacchum* amores suos in eam effusisse, quæ ab alio relicta erat. Certissimum enim est Affectum id petere, et ambire, quod experientia repudiavit. Atque norint omnes qui affectibus suis servientes, et indulgentes premium potiundi in immensum augent, sive honores appetant, sive fortunas, sive Amores, sive gloriam, sive scientiam, sive alia quæcunque, se res relictas petere, & à pluribus, per omnia ferè saecula post experimentum dimissas, & fastiditas. Neque Mysterio caret, quod hædera *Baccho* sacra fuerit. Hoc enim dupli modo convenit. Primum, quod hædera hieme virescat, Deinde quod circâ tot res, arbores, parietes, ædificia serpat, ac circumfundatur, ac se attollat. Quod ad primum enim attinet, omnis affectus per renitentiam & vetitum, & tanquam Antiperistasis (veluti per frigus brumæ hædera) virescit, & vigorem acquirit. Secundò affectus prædominans, omnes humanas actiones & omnia humana decreta tanquam hædera circumfunditur, atque iis se addit, & adjungit & immiscet. Neque mirum est, si superstitioni ritus *Baccho* attribuantur, cum omnis ferè male sanus affectus in pravis religionibus, luxurietur: aut si furores ab eo immitti putentur, Cum omnis affectus, & ipse furor brevis sit, & si vehementius obsideat, & incumbat, in insania terminetur. Illud autem de *Pentheo*, & *Orpheo* Laceratis evidentem habet parabolam; Cum Affectus prævalidus & inquisitioni curiosæ, et admonitioni salutari

salutari, & liberæ, asperimus, atq; infensissimus fit. Postremò illa confusio personarum *Jovis* & *Bacchi*, ad parabolam rectè traduci potest, quandoquidem res gestæ nobiles & claræ, & merita insignia, & gloriofa, interdum à virtute, & rectâ ratione, & Magnanimitate, interdum à latente affectu, & occultâ cupiditate (utcunq; famæ, & Laudis celebritate efferantur) proveniant; ut non facile sit distinguere facta *Bacchi*, à factis *Jovis*.

## XXV.

## ATALANTA, sive Lucrum.

**A**TALANTA cùm velocitate excelleret, de victoriâ Cursus cum Hippomene certamen iniit. Conditiones certaminis erant; victori Hippomenei Conjugium ATALANTÆ, Mors victo. Neq; dubia victoria videbatur, cum ATALANTÆ insuperabilis in cursu præstantia multorum exitio insignita fuisset. Itaque Hippomenes ad dolos animum adjecit. Paravit autem tria Mala Aurea, eaque secum portavit. Res geri cœpit; Præcurrit ATALANTA; Ille cùm se à tergo relictum cerneret, artis non immemor, ex malis Aureis unum ante conspectum ATALANTÆ projectit; non rectâ quidem sed ex transverso, ut illam & moraretur, atque insuper de viâ deduceret; Illa cupiditate muliebri, & Mali pulchritudine illecta, omisso stadio post malum cucurrit, & ad illud tollendum se submisit. Hippomenes interim, spatium stadii non parvum confecit, eamque post se reliquit. Illa tamen rursùs naturali perniciate jacturam temporis resarcivit, atque iterum emicuit; sed cùm Hippomenes secundò & tertìò hujusmodi moras ei injecisset, tandem victor astutiâ non virtute evasit. Fabula videtur Allegoriam insignem proponere de Certamine Artis cum Naturâ. Ars enim per ATALANTAM significata, virtute propriâ, si nihil obstet, & impedit, longè naturâ velocior est, & veluti Cursus citationis; & celerius ad Metam pervenit. Hoc enim in omnibus ferè effectis patet; Cernas fructus ex nucleis tardè, ex infestatione celeriter provenire, Cernas Lutum in generatione Lapidum tardè, in torrefactione Laterum citò durescere; Etiam in Moralibus, dolorum oblivionem, & solatia diuturnitas temporis quasi ex beneficio naturæ inducit. Philosophia autem (quæ veluti Ars vivendi est) diem non expectat, sed præstat & repræsentat. Verùm istam Artis prærogativam & vigorem infinito reruin humanarum detimento, Mala Aurea retardant: Neque reperitur ex scientiis, aut Artibus aliqua, quæ cursum suum verum & legitimum ad finem suum, tanquam ad Metam constanter produxit; Sed perpetuò Artes incopta præcidunt, & stadium deserunt, & ad lucrum & commodum declinant, instar ATALANTÆ,

*Declinat Cursus, Annunque volubile tollit.*

Itaque

Itaque mirum minimè est, si Arti non datum sit, Naturam vincere, & victam ex pacto illo & lege Certaminis perimere, aut destruere; Sed Contrarium eveniat, ut Ars in Naturæ potestate sit, atque veluti nupta mulier conjugi pareat.

## XXVI.

## PROMETHEUS, sive Status Hominis.

**T**radunt Antiqui Hominem fuisse opus PROMETHEI, atque ex Luto factum, nisi quod PROMETHEUS particulas ex diversis Animalibus Massæ admiscuerit. Ille autem cùm opus suum beneficio suo tueri vellet, neque Conditor solum generis humani videri, verùm etiam Amplificator, ad Cœlum ascendit furtim, fasces secum portans ex Ferulâ, quibus ad currum Solis admotis, & accensis, Ignem ad terram detulit, atq; cum hominibus communicavit. Ob tantum PROMETHEI meritum memorant homines parùm gratos fuisse. Quinetiam conspiratione factâ, & *Prometheum* & inventum ejus apud *Jovem* accusârunt. Ea res non perinde accepta, atque æquum videri possit. Nam ipsa accusatio *Jovi*, & Superis admodum cordi fuit. Itaq; delectati non solum ignis usum Hominibus indulserunt, verùm & novum Munus omnium maximè amabile & optabile (perpetuam nimirum Juventam) homines donarunt. Illi gestientes & inepiti, donum Deorum Asello imposuerunt. Inter redeundum autem laborabat Asellus siti gravi, & vehementi; cùmque ad fontem quendam pervenisset, serpens fonti custos additus, eum à potu prohibuit, nisi illud quodcūq; esset, quod in dorso portaret pacisci vellet: Asellus miser conditionem accepit, atque hoc modo instauratio Juventutis, in premium haustus pusillæ aquæ, ab hominibus ad Serpentes transmissa est. Verùm *Prometheus* à Malitia suâ non abscedens atq; hominibus post præmium illud eorum frustratum, reconciliatus, animo verò erga *Jovem* exulcerato, dolos etiam ad Sacrificium adhibere veritus non est. Atq; duos aliquando tauros *Jovi* dicitur immolasse, ita tamè ut in alterius pelle carnes & adipem amborum incluserit, alteram pellem ossibus tantummodo suffarcinârit; atque deinde religiosus scilicet, & benignus *Jovi* optionem concessit. *Jupiter* vafriciem, & malam fidem ejus detestatus, sed nactus occasionem ultionis, Ludibrium illud tauri elegit; atque ad vindictam conversus, cùm se insolentiam *Promethei* reprimere non posse animadverteret, nisi hominum genus (quo opere ille immensum turgebat, & efferebatur) affixisset, *Vulcanus* imperavit, ut fœminam componeret pulchram & venustam, cui etiam Dii singuli dotes suas impertierunt, quæ idcirco *Pandora* vocata est. Huic fœminæ inter manus vasculum elegans posuerunt, in quo omnia mala, & ærumnas incluserant; subsidebat autem in uno vase Spes. Illa cum vasculo suo ad *Prometheum*, primò se contulit, eum captans, si forte

fortè ille vas accipere vellet, & aperire ; quod ille cautus & astutus rejecit. Itaque ad *Epimetheus* *Promethei* fratrem, (sed diversæ admōdum indolis) spreta deflexit. Ille nihil cunctatus, vas temerè aperuit ; cūmq; mala illa omnigena evolare cerneret, serò sapiens, magnâ contentione, & festinatione vasi operculum suum rursùs indere conatus est, vix tamen ultimam, & in fundo residentem Spem servate potuit. Postremò *Prometheo* *Jupiter* plurima & gravia imputans, quod ignis olim furtum fecisset, quod *Jovis* majestatē in sacrificio illo doloſo ludibrio habuisset, quod donum ejus aspernatus esset, novo etiam addito crimine, quod *Palladēm* vitiare tentasset, eum in vincula conjecit, & ad perpetuos cruciatus damnavit. Erat enim jussu *Jovis* adductus ad montem *Caucasum*, atque ibi Columnæ alligatus, ut nullo pacto se movere posset ; aderat autem Aquila, quæ jecur ejus interdiu rostro tundebat atque consumebat, noctu autem quantum comeſum erat, renascebatur ; ut nunquam doloris materia deficeret. Memorant tamen hoc supplicium aliquando finem habuisse : *Hercules* enim in Poculo quod à Sole acceperat, navigato Oceano, ad *Caucasum* pervenit, atque *Prometheum* liberavit, Aquilā Sagittis confixa. Instituta autem sunt, in honorem *Promethei* apud nonnullos populos Lampadiferorum certamina, in quibus decurrentes accensas faces ferebant, quas siextingui contigisset, victoram sequentibus cedebant, & le subducebant, atque is demūm palmam accepit, qui primus facem accensam ad metam usque detulisset.

Fabula contemplationes plurimas veras atque graves & præ se fert & premit. Nonnulla enim in eâ jampridem rectè notata, alia planè intacta sunt. *Prometheus* Providentiam liquidò & disertè significat : Atque in rerum universitate sola desumpta & delecta est ab Antiquis Hominis fabrica & constitutio, quæ providentiæ attribuatur tanquam opus proprium. Hujus rei non solum illud in causâ esse videtur, quod Hominis naturâ Mentem suscipit, atque Intellectum Providentiæ sedem, atque durum quodammodo videtur, & incredibile ex Principiis brutis, & surdis excitare, & educere Rationem & Mentem, ut ferè necessariò concludatur providentia Animæ humanæ indita esse, non sine exemplari & intentione, & Authoramento Providentiæ majoris : Verùm & hoc præcipue proponitur, quod homo veluti Centrum Mundi sit, quatenus ad causâ finales ; adeò ut sublato è rebus Homini, reliqua vagari sine proposito videantur, & fluctuari, atq; quod aiunt, scopæ dissolutæ esse, nec finem petere. Omnia enim subserviunt Homini, isque usum & fructum ex singulis elicit & capit. Etenim Astrorum conversiones, & Periodi, & ad distinctiones temporum, & ad Plagarum Mundi distributionem faciunt. Et Meteora ad præfigia tempestatum, & venti tum ad navigandum, tum ad Molas, & Machinas, & Plantæ, atq; Animalia cujuscunq; generis, aut ad domicilia hominis & latebras, aut ad vestes, aut ad victimam, aut ad Medicinam, aut ad levandos labores, aut denique ad delectationem & solatium referuntur : adeò ut omnia prorsùs non suam rem agere videantur, sed hominis. Neq; temerè additum est, in Massâ illâ & Plasmate, particulas ex diversis animantibus desumptas, atq; cum luto illo temperatas & confusas

## De Sapientia Veterum.

confusas fuisse ; quia verissimum est, omnium rerum quas universum complectitur, hominē rem maximē compositam esse, & decompositā, ut non immeritō ab antiquis mis̄dus minor vocatus sit. Quamuis enim verbi Microcosmi Elegantiam, Chymici nimis putidē, & ad literā acceperint, & detorserint, dum in Homine Omnem Minerām, Omne vegetabile & reliqua, aut aliquid eis proportionatum subesse volunt ; Manet tamen illud solidum & sanum quod diximus ; Corpus Hominis omnium Entium & maximē mistum, & maximē organicum reperiri, quo magis admirandas virtutes, & facultates suscipit, & nanciscitur : Simplicium enim Corporum vires paucæ sunt, licet certæ & rapidæ, quia minimē per Mixtrā refractæ, & comminutæ, & libratae existunt ; virtutis autem Copia & excellentia in Misturā & compositione habitat. Atque nihilominus Homo in originibus suis videtur esse res inermis & nuda, & tarda in Juventutem sui, denique quæ plurimis rebus indigeat. Itaque festinavit *Prometheus* ad inventionem ignis, qui omnibus ferè humanis necessitatibus & usibus suppeditat & ministret levamenta et auxilia : ut si forma formarum Anima, si instrumentum instrumentorum Manus, Etiam auxilium auxiliorum, sive Opis Opium Ignis dici mereatur. Hinc enim Operationes quamplurimæ ; Hinc Artes Mechanicæ, Hinc scientiæ ipsæ infinitis modis adjuvantur. Modus autem furti Ignis aptè describitur, atque ex naturā rei. Is fuisse perhibetur per virgam ex ferulâ ad Currum Solis admotam. Ferula enim ad percussionem & plagas adhibetur, ut luculenter significetur Ignis generationem per corporum violentas percussionses & collisiones fieri, ex quibus attenuantur Materiæ, & in motu ponuntur, & ad calorem Cœlestium suscipiendum præparantur, ignemque veluti ex curru Solis modis clandestinis, ac quasi furtim decerpunt & rapiunt. Sequitur Parabolæ pars insignis. Homines loco gratulationis & gratiarum actionis, ad indignationem, & expostulationem versos esse, atque accusationem & *Promethei* et Ignis apud Iovem instituisse ; eamque rem Iovi acceptissimam fuisse, adeo ut hominum commoda ob hoc novâ munificentâ cumulaverit. Quorsum enim ista criminis ingratii erga Authorem suum animi (quod vitium omnia ferè complectitur) approbatio et remuneratio? Res aliò spectare videtur. Hoc enim vult Allegoria ; Incusationem et Naturæ suæ, & Artis per homines factam, ex optimo Mentis statu proficiisci, atque in bonum cedere ; contrarium Diis invisum, & infaustum esse. Qui enim Naturam humanam vel Artes receptas in immensum extollunt, & effusi sunt in admirationem earum rerum, quas habent, & possident, & Scientias quas profitentur, aut colunt, perfectas prorsus censi volunt ; illi primò adversùs divinam naturam minùs reverentes sunt, cuius perfectioni sua ferè equiparant ; Deinde iidem erga homines magis sunt infructuosí, cùm se ad fastigium rerum jam pervenisse potent, & tanquam perfuncti ulteriora non querant. Contrà qui Naturam et Artes deferunt, et accusant, & queruntur

moniarum pleni sunt, illi verè & magis modestum animi sensum retinent, et perpetuò ad novam industriam, et nova Inventa extimulantur. Quo mihi magis mirari libet Hominum inscitiam, et malum Genium, qui paucorum arrogantiæ servuli, istam Peripateticorum Philosophiam, portionem Græcæ sapientiæ, nec eam magnam, in tantâ veneratione habent, ut omnem ejus incusationem non solum inutilem, sed suspectam & fere periculosam reddiderint. Atque magis probandus est, et *Empedocles*, qui tanquam furens, et *Democritus*, qui magnâ cum verecundiâ, queruntur, Omnia abstrusa esse, nihil nos scire, nil cernere, veritatem in profundis puteis immersam, veris falsa miris modis adjuncta, atque intorta esse; (nam Academia nova modum prorsus excessit) quam Aristotelis schola fidens & Pronunciatrix. Itaque monendi sunt Homines, delationem Naturæ & Artis Diis cordi esse, et novas Eleemosynas, et donaria à divinâ benignitate impetrare, et incusationem *Promethei* licet Authoris et Magistri, eamque acrem et vehementem, magis sanam & utilem, quam gratulationem effusam esse; denique opinionem Copiæ inter maximas causas Inopiae reponi. Quod vero attinet ad Doni genus, quod homines in præmium accusationis dicuntur accepisse (florem Iuventutis videlicet non deciduum) ejusmodi est, ut videantur antiqui de Modis et Medicinis ad senectutis retardationem, & vitæ prolongationem facientibus, non desperasse; sed illa utique numerasse potius inter ea, quæ per Hominum inertiam, & incuriam licet semel accepta perire, aut frustrata sunt; quam inter ea quæ planè negata & nunquam concessa fuerint. Significant enim, et innunt, ex ignis vero usu, atque ex artis erroribus bene & strenue accusatis, & convictis, munificentiam divinam ad hujusmodi dona hominibus non defuisse; ipsos sibi deesse, cum hoc Deorum munus Asello imposuerint lento & tardigrado; Ea videtur esse Experientia res stupidæ & plena moræ, ex cuius gradu tardo & testudineo antiqua illa querimonia de *Vita brevi*, & *Arte longâ* nata est. Atque certè nos in eâ sumus opinione, facultates illas duas, *Dogmaticam* & *Empiricam*, adhuc non benè conjunctas et copulatas fuisse, sed nova Deorum munera, aut Philosophiis abstractis tanquam levi Volucris aut lentæ, & tardæ experientiæ tanquam Asello imposita esse. In quo tamen de Asello illo non malè omnandum est, nisi interveniat illud accidens viæ & sitis. Existimamus enim, si quis experientiæ, veluti certâ lege & Methodo constantem militet, neque inter viam experimenta, quæ vel ad Lucrum faciunt, vel ad ostentationem hauriendi siti corripiatur, adeò ut ad ea comparanda onus suum deponat & distrahat; eum munificentiae divinæ auctæ & novæ Basulum non inutilem fore. Quod vero donum illud ad Serpentes transierit, ea videtur adjectio ad Fabulam ornatus ferè gratiâ, nisi forte illud inferuerint, ut Homines pudeat, se cum igne illo suo, & tot artibus ea in se transferre non posse, quæ Natura ipsa pluribus aliis animalibus largita est. Etiam illa subita Hominum cum *Prometheo* reconciliatio postquam spe

## De Sapientia Veterum.

spe suâ decidissent, monitum habet utile & prudens. Notat enim Hominum levitatem & temeritatem in experimentis novis. Ea enim si statim non succedant, et ad vota respondeant, præproperâ festinatione, homines incepta deserunt, et præcipites ad vetera recurrunt, iisque reconciliantur. Descripto statu hominis, quoad Artes & intellectualia, Parabola transit ad Religionem; culturam enim Artium, cultus Divinorum comitatus est; quem statim Hypocrisis occupavit & polluit. Itaque sub duplice illo sacrificio, eleganter repræsentatur persona verè Religiosi & Hypocritæ. Alteri enim inest adeps, Dei nimirum portio, ob inflammationem, & suffitum, per quod affectus & zelus ad gloriam Dei incensus, atque alta petens significatur; Insunt viscera charitatis, insunt carnes bonæ, & utiles. In altero nihil præter ossa arida, & nuda reperiuntur, quæ nihilominus pellem farciunt, & hostiam pulcherrimam & magnificam imitantur; per quæ rectè notantur externi, & inanes ritus & Ceremoniæ jejunæ, quibus homines cultum divinum onerant & inflant, res ad ostentationem potius compositæ, quam ad pietatem facientes. Neque satis est hominibus hujusmodi ludibria Deo offerre, nisi ea etiam illi imponant & imputent, ac si ipse illa elegerit, & præscriperit. Certè Propheta sub Dei personâ de hac optione expostulat: *Num tandem hoc est illud jejunium, quod ELEGI, ut homo animam suam in diem unum affligat, & caput instar juncce demittat?* Post statum Religionis, Parabola se vertit ad mores, & humanæ vitæ conditiones. Atque pervulgatum est illud, & tamen rectè positum, per Pandoram significari Voluptatem, & Libidinem, quæ post vitæ civilis artes & cultum, & luxum, veluti ex dono ignis, & ipsa incensa est. Itaque Vulcano qui similius ignem repræsentat, opificium voluptatis deputatur. Ab illâ autem infinita mala, & in animos & in corpora, & fortunas hominum unâ cum serâ poenitentiâ fluxerunt; neque tantum in statu singulorum, verùm etiam in regna & respub. Ab eodem enim fonte bella & tumultus, & Tyrannides ortum traxere. Verùm operæ pretium est animadvertere, quam bellè & eleganter fabula duas humanæ vitæ conditiones, & veluti Tabulas sive Exempla sub personis Promethei & Epimethei depinxerit. Qui enim sectam Epimethei sequuntur, illi improvidi, neque in lengum consulentes, quæ in præsentia suavia sunt, prima habent, atque multis sanè propter hoc angustiis & difficultatibus, & calamitatibus premuntur, & perpetuò ferè cum illis conflictantur; interim tamen genium suum placant, atque insuper ob rerum imperitiam multas inanes spes intra animum volvunt, quibus tamen veluti suavibus insomniis se delectant, atque miserias vitæ suæ condidunt. Promethei autem schola, homines nimirum prudentes, & in futurum prospicientes, multa scilicet mala, & infortunia cautè submovent & rejiciunt; verùm cum hoc bono illud conjunctam est, ut multis voluptatibus, & varia rerum jucunditate se privent, & Genium suum fraudent, atque quod multò pejus

pejus est, curis & sollicitudine & timoribus intestinis se crucient, & conficiant. Alligati enim Necessitatis columnæ, innumeris cogitationibus (quæ, quia volucres admodum sunt, per Aquilam significantur,) iisque pungentibus, & jecur mordentibus, & corrodentibus vexantur; nisi fortè aliquando veluti noctu exiguam quamplam animi remissionem, & quietem nanciscantur; ita tamen ut statim subinde redeant novæ anxietates, & formidines. Itaque paucis admodum utriusque fortis beneficium contigit, ut providentiae commoda retinuerint, sollicitudinis, & perturbationis malis se liberasint: neque id quisquam assequi potest, nisi per *Herculem*, id est, Fortitudinem, & animi constantiam, quæ in omnem eventum parata, & cuicunque sorti æqua, prospicit sine metu, fruitur sine fastidio, & tolerat sine impatientiâ. Atque illud notatu dignum est, virtutem hanc *PROMETHEO* non innatam, sed adventitiam fuisse, atque ex ope alienâ. Nulla enim ingenita, & naturalis Fortitudo, tantæ rei par esse possit. Sed hæc virtus ab ultimo Oceano, atque à Sole accepta & advecta est; Præstatur enim à Sapientiâ, tanquam à Sole, & à meditatione inconstantie, ac veluti undarum humanae vitæ, tanquam à navigatione Oceani; quæduo *Virgilius* bene conjunxit.

*Felix qui potuit rerum cognoscere causas,  
Quique metus omnes, & inexorabile fatum  
Subjecit pedibus, strepitumque Acherontis avari.*

Elegantissimè autem additur ad Hominum animos consolandos & confirmandos, *Heroem* istum ingentem in poculo sive urceo navigâsse: ne fortè naturæ suæ angustias, & fragilitatem nimium pertimescant, aut causentur; ac si hujusmodi fortitudinis & constantiæ capax omnino non esset; de quo ipso *Seneca* bene ominatus est cum dicat, *Magnum est habere simul fragilitatem hominis, & securitatem Dei.* Sed jam retrocedendum est ad illud, quod consultò præterivimus, ne ea quæ inter se connexa sunt abrumperemus: Hoc est, de novissimo illo *Promethei* criminе, quod pudicitiam *Minervæ* sollicitâset. Nam & ob hoc Delictum gravissimum certè, & maximum, illam poenam laniationis viscerum subiit. Illud non aliud esse videtur, quam quod homines artibus, & Scientiâ multâ inflati, etiam Sapientiam divinam sensibus & rationi subjecere sæpiùs tentent; ex quo certissimè sequitur mentis laceratio & stimulatio perpetua & irrequieta. Itaque mente sobriâ & submissâ distinguenda sunt humana & divina; atque oracula sensus, & fidei; nisi fortè & religio hæretica, & philosophia commentitia hominibus cordi sit. Restat ultimum illud de ludis *Promethei* cum tædis ardentibus. Hoc rursus ad Artes & Scientias pertinet, sicut Ignis ille, ad cuius memoriam & celebrationem hujusmodi Ludi instituti sunt; atque continet in se monitum, idque prudentissimum; ut perfectio Scientiarum à successione, non ab unius alicujus perniciate, aut facultate expectetur. Etenim qui ad cursum & contentionem velocissimi & validissimi sunt, ii ad faciem

## De Sapientia Veterum.

suam accensam servandam fortassis minùs sunt habiles, cùm à cursu rapido, æquè ac nimis tardo, periculum extinctionis immineat. Isti autem Luminum cursus & certamina jampridem intermissa vi-dentur, cùm Scientiæ in primis quibúsque authoribus, *Aristotele*, *Galen*, *Euclide*, *Ptolomeo*, maximè florere cernantur; atque successio nil magni effecerit, aut ferre tentaverit. Atque optandum esset, ut isti Ludi in honorem *Promethei* sive Humanæ Naturæ instaurarentur, atque Res certamen & æmulationem & bonam fortunam reciperet, neque ex unius cujuspiam face tremulâ atque agitatâ pen-deret. Itaque homines monendi sunt, ut se ipsi exuscitent, & vi-res atque etiam vices suas experiantur, neque in paucorum homi-num animulis & cerebellis omnia ponant. Hæc sunt illa, quæ in Fa-bulâ istâ vulgari, & decantatâ nobis adumbrari videntur: neque ta-men inficiamur, illi subesse haud pauca, quæ ad Christianæ fidei mysteria miro consensu innuant; ante omnia Navigatio illa *Her-culis* in Urceo ad liberandum *Prometheum*, Imaginem Dei Verbi in carne tanquam fragili vasculo ad redemptionem humani properan-tis præ se ferre videtur. Verùm nos omnem in hoc genere licentiam nobis ipsi interdicimus, ne forte Igne Extraneo ad Altare Domini utamur.

---

Icarus

---

XXVII.

**Icarus volans: item Scylla, & Charybdis, sive, Via media.**

**M**ediocritas, sive Via Media, in Moralibus laudatissima est; in Intellectualibus minùs celebrata, sed non minùs utilis, & bona: In Politicis tantùm suspecta, & cum judicio adhibenda. Morum autem Mediocritates, per viam ICARO prescriptam; Intellectualium autem, per viam inter *Scyllam* & *Charybdis* ob difficultatem & periculum decantatam, ab Antiquis notantur. ICARO praecepit Pater, cùm Mare esset prætervolandum, ut viam aut nimis sublimem, aut nimis humilem caveret. Cùm enim Alæ cerà essent conglutinatae, periculum erat si altius efferretur, nec cera ex Solis ardore liquefieret; sin ad vaporem Maris proprius se submitteret, ne abhumore cera minùs tenax efficeretur. Ille verò ausu Iuvenili in celsiora contendit, atque in præceps lapsus est. Parabola facilis & vulgata est; Virtutis enim via inter Excessum, & Defectum recto tramite aperitur. Neque mirum erat, si ICARUM, Iuvenili Alacritate gestientem, Excessus perdiderit. Excessus enim ferè Iuvenum; Defectus Senum vitia esse solent. Ex semitis tamen malis, & nocivis, elegit ICARUS, (si planè pereundum erat) meliorem. Defectus enim rectè aestimantur Excessibus praviores. Quandoquidem Excessui, nonnihil Magnanimitatis subsit, & cognationiscum Cœlo, ad instar volucris: Defectus verò humili serpat, instar Reptilis. Praclare Heraclitus; *Lumen siccum, optima Anima*. Nam si ex humo humorem contrahat Anima; prorsus depremitur & degenerat; Interim tamen Modus adhibendus est, ut ab illâ siccitate laudatâ, Lumen reddatur subtilius, non corripiatur incendium. Atque hæc cuivis ferè nota sunt. At via illa in Intellectualibus inter *Scyllam* & *Charybdis*, certè & peritiam navigandi, & fœlicitatem desiderat. Si enim in *Scyllam* incident Naves, illiduntur cautibus: sin in *Charybdis*, absorbentur. Cujus Parabolæ ea videtur esse vis (quam nos breviter perstringemus, tametsi infinitam trahat contemplationem) ut in omni Doctrinâ & Scientiâ, earumque Regulis & Axiomatibus, Modus teneatur inter Distinctionum Scopulos, & universalium Voragine. Hæc enim duo naufragijs ingeniorum, & Artium famosa sunt.

**Sphinx,**

## XXVIII.

## S P H I N X , sive Scientia.

**T**raditur SPHINX fuisse Monstrum specie multiforme; facie, & voce virginis; pennis volucris; unguibus *Gryphi*; Iugum autem Montis in agro *Thebano* tenebat, & vias obsidebat: Mos autem ei erat, viatores, ex infidijs invadere, ac comprehendere; quibus in potestatem redactis, Ænigmata quædam obscura & perplexa proponebat, quæ à Musis præbita, & accepta putabantur. Ea si solvere, & interpretari, miseri captivi non possent; hæsitantes & confusos in illis, magnâ sævitâ dilaniabat. Hæc calamitas cùm diu grassaretur; præmium propositum est à *Thebanis*, (ipsum *Thebarum Imperium*) viro qui *Sphingis* Ænigmata explicare possit, (neque enim alia superandæ illius ratio erat.) Tanto pretio excitatus *Oedipus* vir acer, & prudens, sed pedibus læsis, & perforatis conditionem accepit, & experiri statuit. Postquam autem fidens animi & alacer se coram *Sphinge* stitisset; Illa ab eo quæsivit, quale tandem illud Animal esset, quod primò quadrupes natum, postea bipes factum esset, deinde tripes, ad extremum rursus quadrupes. Ille præsenti animo respondit, Illud in Hominem competere, qui sub ipsum partum & infantiā quadrupes provolvitur, & vix repere tentat, nec ita multò post erectus & bipes incedit; in Senectute autem baculo innititur, & se sustentat, ut tanquam tripes videatur; extremâ autem ætate decrepitus Senex labantibus nervis, quadrupes decumbit, & lecto affigitur. Itaque vero responso victoriam adeptus, *Sphingem* intereinit; Cujus corpus Afello impositum, veluti in Triumpho ducebatur; ipse autem ex pactis Rex *Thebanorum* creatus est. Fabula elegans, nec minùs prudens est; atque videtur conficta, de Scientiâ, præsertim conjunctâ practicæ. Siquidem Scientia non absurdè Monstrum dici possit, cùm ignorantibus & imperitis prorsus admirationi sit. Figuri autem, & specie multiformis est, ob immensam varietatem subjecti, in qua Scientia versatur; vultus & vox affingitur Muliebris ob gratiam & loquacitatem: Adduntur alæ, quia Scientiæ & earum Inventa momento discurrunt, & volant; cùm Communicatio Scientiæ fit instar Luminis de Lumine, quod affatim incenditur. Elegantissimè autem attribuuntur unguis acuti, & adunci; quia Scientiæ Axiomata, & Argumenta penetrant mentem, eamque præhendunt & tenent, ut movere & elabi non possit; quod & sanctus Philosophus notavit; verba *Sapientum* (inquit) sunt tanquam *Aculei*, & veluti *Clavi* in altum defixi. Omnis autem Scientia collocata videtur in arduis & editis Montium. Nam res sublimis meritò putatur, & excelsa, & ignorantiam tanquam ex superiori loco despiciens, atque etiam latè & undequaque speculatur & prospicit, ut in verticibus Montium fieri solet. Vias autem obsidere fingitur Scientia, quia ubique in Itinere isto, sive peregrinatione

tione vitæ humanæ, Materia & occasio Contemplationis se ingerit & occurrit. Proponit autem *Sphinx* Quæstiones & Ænigmata mortali bus varia & difficilia, quæ accepit à Musis. Ea tamen quamdiu apud Musas manent, sævitia fortalsè carent. Donec enim nullus aliis finis Meditationis, & disquisitionis sit, præter ipsum Scire, Intellectus non premitur, nec in Arcto ponitur, sed vagatur, & expatiatur; atque in ipsâ dubitatione, & varietate nonnullam jucunditatem & delectationem sentit; sed postquam à Musis hujusmodi Ænigmata ad *Sphingem* transmissa sunt, id est, ad Practicam, ut instet, & urgeat Actio & Electio, & Decretum: tum demùm Ænigmata molesta & sæva esse incipiunt, & nisi solvantur & expediantur, animos hominum miris modis torquent, & vexant, & in omnes partes distrahunt, & planè lacerant. Proinde in Ænigmatibus *Sphingis* duplex semper proponitur conditio; non solventis mentis laceratio; solventi Imperium. Qui enim rém callet, is sine suo potitur, atque omnis artifex Operi suo imperat. Ænigmatum autem *Sphingis* duo in universum sunt genera: Ænigmata de Naturâ rerum, atque Ænigmata de Naturâ hominis; Atque similiter in præmium solutionis sequuntur duo Imperia; Imperium in Naturam, & Imperium in Homines; Veræ enim Philosophiæ Naturalis finis proprius & ultimus est, Imperium in res Naturales, Corpora, Medicinas, Mechanica, alia infinita; licet Schola, oblatis contenta, & sermonibus tumefacta, Res & opera negligat, & ferè projiciat. Verum Ænigma illud *Oedipodi* propositum, ex quo ille Imperium *Thebanum* adeptus est, pertinebat ad naturam Homini: Quisquis enim naturam Hominis prorsùs introspexit, ille faber ferè fortunæ suæ esse potest, & ad imperandum natus est. Id quod de Romanis artibus benè pronunciatum est,

*Tu regere Imperio populos, Romane memento.*

*Hæ tibi erunt artes.* —

Itaque appositiè illud; quod *Augustus Cæsar* signo *Sphingis*, sive de industria, sive fortuitò usus est. Ille enim (si quis unquam) in Politicâ excelluit, & in vitæ suæ curriculo, plurima nova Ænigmata de Naturâ hominis fœlicissimè solvit, quæ nisi dexter & paratus solvisset, multoties non procul ab imminentे pernicie & exitio abfuisset. Atque additur in Fabula, *Sphingis* devictæ Corpus in Asellum impositum fuisse. Elegantissimè certè, cum nihil sit tam acutum, & abstrusum, quin postquam planè intellectum, & deinceps pervulgatum sit, etiam tardo imponi possit. Neque illud prætermittendum; debellatam esse *Sphingem* à viro pedibus clavato; Etenim nimis cito pede, & celeri gradu ad Ænigmata *Sphingis* homines properare solent; unde fit, ut (prævalente *Sphinge*) potius per disputationes ingenia & animos lacerent, quam per opera & effectus imperent.

## XXIX.

PROSERPINA, sive  
Spiritus.

**N**arrant PLUTONEM, postquam regnum Inferorum ex partione illâ memorabili accepisset, de nuptiis alicujus è superis desperâsse, si eas per colloquia, aut modos suaves tentaret; ut ad Raptum confilia sua dirigere ei fuerit necesse. Itaque captatâ opportunitate PROSERPINA Cereris filiam, virginem pulcherrimam, dum flores *Narcissi* in *Sicilia* pratis colligeret, subito incursu rapuit, atque quadrigis secum ad subterranea asportavit; Ei magna reverentia præbita est, ut & Domina Ditis vocata sit. Ceres autem ejus mater, cùm filia sibi unicè dilecta nusquam comparuisset, supra mundum mœsta & anxia, tædam accensam ipsa manu præ se ferens, universum orbis terrarum ambitum peragravit, ut filiam investigaret & recuperaret. Id cùm frustra fuisset, accepto fortè indicio, quod ad Inferos deveyta esset, multis lachrymis & lamentationibus Jovem fatigavit, ut illa ei restitueretur. Atque tandem pervicit, ut si illa nihil ex iis quæ apud Inferos essent, degustasset, tum eam abducere liceret. Ea conditio Matris desiderio adversa fuit; PROSERPINA enim grana tria ex malo granato gustâsse comperta est. Neque ideo Circo Ceres destitit, quin preces & ploratus de integro resumeret. Postremò itaque ei indulatum est, ut PROSERPINA dispertitis temporibus, & alternis vicibus, sex menses cum Marito, alteris sex cum Matre esset. Hanc PROSERPINAM posteà *Theseus* & *Perithous* eximia audaciâ thalamo Ditis deducere tentarunt. Cùm autem in itinere super saxo apud inferos defessi consedissent, eis resurgere minimè licuit, sed æternum sedebant. PROSERPINA itaque Inferorum Regina mansit; in cujus honorem etiam additum est privilegium magnum; Cum enim ab inferis revocare gradum, illis qui eò descendissent, fas non esset; ascripta est huic legi Exceptio singularis; ut si quis Ramum Aureum in donum PROSERPINÆ attulisset, ei ob hoc ire & redire liceret. Is ramus unicus erat in ingenti, & opaco luco, neque stirps erat, sed visci instat in alienâ arbore frondebat, atque avulso illo alter non deficiebat. Fabula ad Naturam pertinere videtur, atque vim, & copiam illam in subterraneis, divitem & frugiferam, ex quâ hæc nostra pullulant, & in quam rursùs solvuntur, & redeunt, perscrutari. Per PROSERPINAM antiqui significarunt Spiritum illum æthereum qui sub terra (per Plutonem repræsentatâ) clauditur & detinetur à superiore globo divulsius, quod non malè expressit ille.

*Sive recens tellus, seductaque nuper ab alto  
Æthere, cognati retinebat semina cœli.*

Ille spiritus raptus à Terrâ fngitur, quia minimè cohibetur, ubi tempus, & moram habet ad evolandum, sed subitâ confractione & comminutione tantum, compingitur & fngitur, perinde, ac si quis aerem aquæ cominiscere tentet; Quod nullo modo efficere possit, nisi per agitationem celerem & rapidam; hâc enim ratione vides illa corpora conjungi in Spumâ, Aere tanquam rapto ab Aquâ. Neque ineleganter additur, PROSERPINAM flores Narcissi in vallis colligentem raptam fuisse; Quia Narcissus à torpore sive stupore nomen sumit; atque tum demùm spiritus ad raptum Materiæ Terrestris magis præparatus est & opportunus, cum coagulari incipit, ac veluti torporem colligere. Rectè autem tribuitur honor ille PROSERPINÆ, qualis nulli uxori Deorum; ut Ditis Domina sit, quia ille spiritus planè omnia in illis regionibus administrat, stupido & quasi ignaro Plutone. Hunc autem spiritum Æther, ac vis Cœlestium (per Cererem adumbrata) infinitâ sedulitate elicere, atque sibi restituere contendit; Fax autem illa Ætheris sive Tæda ardens in manu Cereris proculdubio Solem denotat, qui circa terræ ambitum luminis officio fungitur, atque maximi omnium esset ad PROSERPINAM recuperandam momenti, si omnino hoc fieri posset. Illa tamen hæret, & manet: Cujus ratio sequitur accuratè & excellenter proposita in Pacts illis Jovis & Cereris. Primum enim certissimum est, duos esse modos spiritus in Materiâ solidâ & terrestri cohibendi. Alterum per Constipationem sive obstructionem, qui est mera incarceratio & violentia. Alterum per Ministrationem proportionati alimenti, atque id fit sponte & libenter. Postquam enim Spiritus inclusus depascere incepit, atque se alere, evolare protinus non festinat, sed veluti in Terrâ suâ figitur: Atque hæc est illa degustatio PROSERPINÆ ex malo granato: quæ si non fuisset, jam pridem à Cerere cum face illâ suâ orbem terrarum peragrante, abducta fuisset. Spiritus enim qui subest metallis & mineralibus compingitur fortasse præcipue per Massæ soliditatem; qui autem in Plantis est & Animantibus, in corpore poroso habitat, & aperta effugia habet, nisi per illum modum Degustationis libenter detineretur. Secundum autem partum de Semestri consuetudine, non aliud est quam Elegans descriptio dispertitionis Anni; cum spiritus ille per terram perfusus, quoad res vegetabiles mensibus æstatis apud superiora degat, atque mensibus hyemis ad subterranea redeat. Quod verò attinet ad conatum illum Thesæ & Perithoi abducendæ PROSERPINÆ, id eò spectat, quod saepius fiat, ut spiritus subtiliores qui ad terram in multis corporibus descendunt, ne cuti quam illud efficiant, ut Spiritum subterraneum exfugant & secum uniant & evehant; Sed contra ipsi coagulentur, neque amplius resurgent; ut PROSERPINA per eos aucta incolis & imperio sit.

fit. De virgâ autem illâ aureâ, vix videmur sustinere posse impetum Chymistarum, si in nos hac ex parte irruant; cùm illi ab eodem lapide suo, & Auri montes, & Restitutionem corporum naturalium veluti à Portis Inferorum promittant. Verùm de Chymica, atque Lapidis illius Procis perpetuis; certò scimus Theoricam eorum esse sine fundamento, suspicamur etiam practicam esse sine certo pignore. Itaque missis illis, de istâ postremâ Parabolæ parte hæc nostra sententia est. Nobis certè compertum est ex pluribus Antiquorum figuris, eos Conservationem, atq; Instauratiōnē quādamtenus corporum naturalium, pro re desperatâ non habuisse, sed potius pro re abstrusa, & quasi aviâ. Atque idem sentire hoc etiam loco videntur, cùm virgulam istam inter infinita virgulta ingentis & densissimæ Sylvæ collocarunt; Auream autem finxere, quia Aurum Durationis *Tessera* est: Insitivam, quia ab Arte hujusmodi effectus sperandus est, non ab aliquâ Medicinâ, aut modo simplici, aut naturali.

## XXX.

**METIS, sive Consilium.**

**N**arrant Poëtæ antiqui JOVEM cepisse in uxorem METIN, cuius nomen non obscurè *Consilium* significat; eam autem ex illo gravidam factam fuisse: Quod cum ille sensisset, partum ejus nullo modo expectâsse, sed utique eam devorasse, unde & ipse prægnans factus sit: Puerperium autem mirum fuisse: Nam ex capite, sive cerebro *Palladem* armatam peperisse. Hujus Fabulæ monstrans, & primo auditu insulsissimæ sensus, arcanum Imperij contine-re videtur; quâ arte scilicet, Reges se versus Consilia sua gerere soleant, ut authoritas, & majestas eorum non solùm illibata conservetur, verùm apud populum augeatur, & extollatur. Nam Reges se cum Consilijs suis, vinclo veluti nuptiali copulare & conjungere, & de rebus maximis cum eis deliberare, recto & prudente Instituto con-sueverunt; Idque Majestatem eorum neutquam imminuere, haud abs re judicant: verùm cùm Res jam ad Decretum spectat, quod instar partus est; Consilij partes non ultrà tendere sinunt, ne acta ex Consilijs arbitrio pendere videantur. Verùm, tum demùm Reges (nisi hujusmodi res sit, ut invidiam à se derivare cupiant) quicquid à Consilio elaboratum ut veluti in utero efformatum est, in se transferre con-sueverunt, ut decretum & Executio (quæ quia cum potestate procedit, & necessitatē infert, elegantè sub figurâ *Palladis* armatæ involvitur) ab ipsis emanare videatur. Neque satis est, ut hoc ab Autoritate Regum & eorum Voluntate, solutâ, & liberâ, et non obnoxia, profectum videatur; nisi etiam hoc sibi Reges sumant, ut ex Capite eorum, id est, ex Jūdicio, et prudentiâ propriâ, decreta nata existentur.

Syren

XXXI.

SIRENES, sive Voluptas.

Fabula de SIRENIBVS ad perniciosas illecebras voluptatis recte, sed sensu vulgatissimo transfertur. Nobis autem videtur, SAPIENTIA VETERVM, tanquam Vuæ malè Calcatæ; ex quibus licet non nihil exprimitur, tamen potissima quæque resident, & prætermittuntur. SIRENES Acheloi, & Terpsichores unius ex Musis, filiæ fuisse narrantur; Eæ primis temporibus alatae erant; sed initio temere cum Musis certamine victæ, alis mulctatæ sunt. Ex pennis autem evulsis, Musæ Coronas sibi fecerunt; adeo ut ab eo tempore Musæ cum Capitibus alatis procederent, præter unam SIRENV M Matrem; Mora autem SIRENV M erat in Insulis quibusdam amœnis; Illæ verò è speculâ naves adventantes cum conspicerent, Cantu navigantes primò detinebant, deinde alliciebant, exceptos autem neabant. Neque simplex erat Cantilena, sed singulos modis maximè naturæ eorum convenientibus captabant. Tanta autem pestis erat, ut Insulæ SIRENV M etiam longè intuentibus alberent ex ossibus cadaverum inhumatorum. Huic malo remedium repertum est genere, & modo duplex; Alterum ab Ulyssè, Alterum ab Orpheo; Ulysses socijs omnino aures cerâ obturari jussit; Ipse, cum experimentum rei facere vellet, periculum autem depellere, se ad malum navis alligari voluit, interminatus, ne quis eum, licet rogatus, solveret; Orpheus vero, missis hujusmodi vinclis, clarâ voce Deorum laudes cantans ad lyram, voces SIRENV M retudit, & extra omne periculum fuit.

Fabula ad mores pertinet, atque minimè obscura sanè, nec tamen inelegans Parabola videtur. Voluptates ex Copiâ rerum, ac affluentiâ; atque ex Hilaritate, sive exultatione animi proveniunt. Illæ olim primis ipsis illecebris subito, & tanquam alatae, mortales rapere solebant. Doctrina autem & Eruditio, hoc saltem effecit, ut animus humanus se non nihil cohibeat, & exitum rei secum perpendat; itaque alas voluptatibus detraxit. Hoc autem in Musarum decus & honorem egregium cessit; Postquam eniun Philosophiam contemptum voluptatum inducere posse nonnullorum exemplo patuit; statim res sublimis visa est, quæ animam veluti humo affixam attollat & evehat, & hominum cogitationes (quæ in capite vigent) pennatas & velutæ threas faciat. Sola Sirenum Mater pedestris, & sine aliis mansit; Ea proculdubio nil aliud est, quam Doctrinæ leves, & ad jucunditatem inventæ, & adhibitæ; quales videntur Petronio illi in pretio fuisse, qui postquam sententiam Mortis accepisset, in ipsis atrijs Mortis delicias qualivit, cumque etiam literas in solarium adhibere vellet, nil (inquit Tacitus) legit eorum, quæ ad constantiam faciunt; sed leves versus. Ex hoc genere est illud.

*Vivamus mea Lesbia, atque amemus,  
Rumor esque senum severiorum  
Omnes unius aestimemus Assis.*

Et illud.

*Iura senes nōrint, & quid sit fāsque, nefāsque,  
Inquirant tristes legūmque examina servent.*

Hujusmodi enim doctrinæ, alias Musarum Coronis rursus detrahere, & Sirenibus restituere velle videntur. Habitare autem prohibentur Sirenes in Insulis, quia voluptates ferè secessus querunt, atque hominum coetus saepe vitant: Sirenum autem cantus omnibus decantatus est, ejusque pernicies, & artificium varium: Itaque interprete hæc non egent. Illud magis acutum de ostib[us] veluti Clivis albentibus è longinquo visis: Ex quo illud significatur, exempla Calamitatum liet clara & conspicua, contra voluptatum corruptelas non multum proficere. Restat de remediis Parabola non abstrusa ea quidem, sed tamen prudens & nobilis. Proponuntur enim Mali tam callidi & tam violenti remedii tria. Duo à Philosophia: Tertium à Religione. Atque primus effugij modus est, ut quis principiis obstat, atque omnes occasiones, quæ animum tentare, & sollicitare possint, sedulo devitet: Id quod obturatio illa aurum denotat; atque hoc remedium ad animos mediocres, & plebeios necessariò adhibetur, tanquam ad Comites Ulyssis. Animi autem celsiores etiam versari inter medias voluptates possunt, si Decreti cōstantiā se muniant: quin & per hoc, virtutis suæ experimentum magis exquisitum capere gaudent; etiam voluptatum ineptias & insanias perdiscunt, potius contemplantes, quam obsequentes; quod & Salomon de se professus est, cum enumerationem voluptatum, quibus diffuebat, eâ sententiâ claudat: *Sapientia quoque perseveravit tecum.* Itaque hujusmodi Heroes inter maximas Voluptatum illecebras se immobiles præstare, atque in ipsis earum præcipitiis se sustinere queant; tantum ad Ulyssis exemplum, interdictis perniciosis suorum consiliis & obsequiis, quæ animum maximè omnium labefactare & solvere possint. Præstantissimum autem in omni genere est remedium Orphei; qui laudes Deorum cantans & reboans, SIRENUM voces confudit, & summovit. Meditationes enim Rerum Divinarum, Voluptates Sensus non tantum potestate, sed etiam suavitate superant.

FINIS.

ETIACUM

ALLEGORICO

REPRESENTATIONIS PICTUS.

BRITANNIAE LIBERTATIS  
BATTAGLIA IN CANTABRIO,

CONTRARIO A VENATIONE

ANNO MDCCLXVII. P. P.

Veneris que l'ont de nos Japonais.

Rabat le temps de la morte.

Oncor que l'ont de la morte.

Le temps de la morte.

DIALOGUS  
DE  
Bello Sacro:  
Fragmentorum prius.  
PER  
Franciscum Baconum  
Baronem de Verulamio,  
*Vice-Comitem S. Albani.*

---



---

LONDINI,  
Typis Ioh. HAVILAND.

---

Prostant ad Insignia Regia in Coemeterio D. Pauli,  
apud Iocosam Norton & Richardum Whitakerum.

Dicitur Apostoli Iacobus Dicitur

Dicitur E

Beatuetio Sancti Claudius

Habituituatuonis dominus

Per E

Imprimantur hec pagines, Ut ex ungue Leonem.

Beatuetio Victorij de Grauio

Iohannes COCEVS.



Londoni Typis Iohni Havilainu

Printed by Hughius Regis in Compton. F. 15.  
Spalding 1603. in Vellum. & Ripped with W. Peckham.



A D

Reverendissimum  
in CHRISTO Patrem,

LANCELOTVM ANDREWES  
Episcopum Wintoniensem,

REGIÆ MAIESTATI

à Sanctioribus Consiliis.

*Reverende Præst;*

**N**ter Consolationes, haudquaquam minima est, si quis sibi aliorum Calamitates representet, quæ cum suis conformitatem habeant. Exempla enim penetrant magis, quam Argumenta; Quinetiam illud Nobis innuunt, quod Scriptura in Solatium adducit; *Nihil novi nobis accidisse.* Afficiunt autem Exempla cō magis, quò propius ad Similitudinem Rerum nostrarum accedunt: Multoque adhuc magis, si Fortuna illos non levius multarit, qui nobis ipsis, dignitate & virtute, præcelluerunt. Etenim, ut inanem præsumptionem sapit, si nos ipsos cum Melioribus componamus; Ita, ex alterā parte, recte & salubriter infertur Conclusio; Si alii nobis Superiores, similia perpeſsi ſint, non eſſe cur nos ſupra modum conqueramur.

In hoc Consolationis genere, equidem mihi ipſi minime

## *Epistola Dedicatoria.*

defui; *Quamvis ut Christianus*, (per infinitam Dei Misericordiam,) altiores etiam Consolations degustaverim. *Quamobrem*, ex variâ Rerum Memoriâ, & Librorum Lectione, cùm Exempla haud pauca, tamen vetera, quâm recentia, mihi ante oculos, proposuisset; Cogitationes meæ moram (fateor) fecerunt, imò etiam acquieverunt, in tribus præcipue *Viris*; Tanquam maxime eminentibus, & cum illâ Fortunâ, quæ mea aliquando fuit, conjunctissimis. Hi tres, in Rebus pub. suis, singuli, Magistratibus amplissimis perfuncti sunt: Idem, non præliis, aut alio Infortunii genere, dejecti, sed Judiciis, & Legum Auctoritate, tanquam Rei, & Delinquentes, abdicati; Idem insuper celebres fuerunt Scriptores, ita ut Memoria Calamitatis ipsorum, apud Posteritatem Jam maneat, & se exhibeat, tanquam Pictura quæ nocte gesta representet, inter pulcherrimas & illustres Operum & Actorum suorum Tabulas: Quin & omnes tres, (si hoc ad fæm conduceret) Exempla fuerunt valida, ad extingnendam cuiuspiam Ambitionem, Fortunam de novo tentandi: Quandoquidem tunc quisque eorum, magnâ cum gloriâ, revocatus & restitutas fuerit; sed ad graviorem suam ruinam, quæ in Morte violentâ exitum reperit. Fuerunt hi tres *Viri*, *Demosthenes*, *Cicero*, & *Seneca*. Quando igitur, cum *Viris* hisce eximiis, Me, tum Fortuna, tum Studia, conjuxerint, inquirere & observare cœpi, quomodo Calamitates illi suas toleraverint, & præcipue quomodo tempus impenderint, cùm à Civilibus Negotiis prorsus abdicati, & inhabiles pronunciati sint: Ut ab illis aliquid addiscerem; Utque mihi non solum *Consolatorum*, verum etiam *Consiliatorum* loco essent. Observavi autem, quam diversis modis, Infortunia illorum illos affecerunt; Èa præcipue in re, de quâ inquirere cœperam; Temporis scilicet, & Calamorum suorum, applicatione *Ciceronem* vidi, durante exilio suo, (quod biennium fermè complevit,) ita animo emollitum & dejectum, ut nihil prater Epistolæ quasdam muliebres exarayerit, omnia Questibus implentes. Attamen, ex tribus illis, (in eo quidem judicio,) minima ei Caussa affuit, cui magnopere perturbaretur. Etsi enim judicatum fuisset; eoque Judicii genere, quod summam Auctoritatem obtinuit; *Lege scilicet latâ* ut exularet, & iuniversæ ejus Fortunæ

## *Epistola Dedicatoria.*

Fisco addicerentur, Domus ejus diruerentur ; Usque Capitale cuivis esset, qui de ejus Restitutione ageret ; Nihilominus, Calamitas ejus, et iam eo tempore, Ignominiae notâ caruit ; Atque nil aliud quām Temporis Procella reputabatur, quæ eum tanquam turbine subverterat. *Demosthenes* contrà, licet Judicium quo proscriveretur, Ignominiae plenum esset ; utpote Repetundarum damnatus ; Neque Repetundarum simpliciter, sed quæ cum proditione, & læsa Majestate, conjunctæ essent ; Nihilominus Calamitatis suæ, sensum tam exiguum præ se tulit, ut Exilii tempore, Negotiis Civilibus non abstineret, sed iisdem se immisceret ; Atque per Literas sibi, Consilio suo Impertire Populum Athenensem ausus esset, non minus quam si adhuc ad clayum foderet ; ut patet in quibusdam ejus *Epistolis*, quæ hodiè extant. *Seneca* certè, qui ob Corruptelas varias, & Crimina, damnatus fuit, & in exilium actus in *Insulam* quandam solitariam, mediocritatem servavit : Quamvis enim Calamus ejus non refrixit, tamen in Negotia Civilia se ingerere abstinuit : Sed otium quod nactus erat, in scribendis *Libris* quibusdam, excellentis Argumenti & Usus, in omne xvum, insumpsit ; Licet aliquos eorum dedicaverit, minus pro dignitate.

*Exempla* hæc, in Instituto quodam, ad quod etiam alias sponte inclinabam, me multum confirmârunt ; ut concessum mihi Tempus, omnino, in scribendo, impenderem ; Utque *Talentum à Deo concreditum*, non ut prius Trapezitis particubus, sed Excambiis publicis, quæ nunquam exhaustientur, & usuram pro certo reddent, committerem. Itaque, cùm ante Annos aliquot, *Instauracionis* inæ Partem edidisset ; (Quod quidem Opus, inter Opera mea, illud est ; (*Si nunquam fallit Imago* ;) Cui plurimum tribuo ; ) Decrevi certè, in ceteris ejus Partibus, minime defatisci. Quod etiam nunc ago. Etsi autem de illo Opere, Testimonia plurima, ex Partibus Transmarinis receperim ; (Talia certè, quibus non potuerim majora, cum tam insigni Approbatione & Honore, sub initii, in Argumento tam abstruso expectare ; ) Illud tamen Animo meo penitus insedit ; Opus memoratum, Hominum, præsertim vulgaris judicii, Capita supervolare. Itaque constitui, ( licet inversâ paulisper Ordinis serie, ) Rem ad Sensus judicium deorsum trahere, per *Exempla* quædam, &

## *Epistola Dedicatoria.*

Portiones *Naturalis Historiae*, & *Inquisitiones* super eam: Quod etiam ex parte feci. Rursus, quia Opus meum, *De Augmentis Scientiarum*, Parasceve quædam, & tanquam Clavis esse possit, ad *Instaurationis* sensum melius referandum; (Quippe quod Notionum & veterum & novarum mixturam recipiat; ubi *Instauratio* novas tantum Notiones proponat meras; nisi quod hinc & inde inspergantur veteres ad gustum tantum;) consentaneum putavi, illud Opus in Linguam Generalem ex Vernaculâ vertere; Non sine multis & magnis Additionibus, præsertim in Libro secundo; Qui *Partitiones Scientiarum* complectitur: Idque ita cumulate præstiti, ut judicem *Librum* illum, jam in plures divisum, pro primâ *Instaurationis* Parte, haberri posse; Quam, *Partitionum Scientiarum* nomine, anteā insignivi: Et sic fidem meam, in hac parte, liberari confido. Atque hoc etiam jam peractum est. Præterea, quoniam Civilem, quam tam diu sustinui, Personam, prorsus exuere non potui; (Cujus si ipse obliviscerer, satis multi meminissent,) Opus etiam de *Legibus* ingressus sum; Hoc Instituto, ut Characterem quendam Justitiae proponebam, mediae cujusdam naturæ, inter Speculativas & speciosas Legum Descriptiones à Philosophis factas, atque Scripta Jurereconsultorum, qui particularibus Placitis, & Scitis, Patriarum & Rerum pub. suarum, sunt, ut plurimum, obnoxii & astricti. Hoc autem Opus, quoniam tantum absorptum fuisset temporis, atque alia jure præcedere deberent, infectum reliqui; Solummodo Portiunculam ejus quandam, ad exemplar, in uno ex Libris *De Augmentis Scientiarum*, (octavo scilicet,) exhibui. Verum est etiam, (fateor,) me in animo habuisse, *Digestum* quoddam, Legum Patriæ meæ, ut componerem; sed quia plurimorum Manibus indigebat, neque ex Me solo pendebat, illud quoque deposui. Jam, cùm in *Instauratione* meâ, universi Generis Humani Bonum, mihi ante oculos proposuerim; ut vita humana excoleretur, beatetur, & ampliori à Naturâ dote donaretur; In Opere autem illo de *Legibus*, cuius initia perstrinxii, (ut dictum est,) Humani Generis similiter Bonum mihi proposuerim, sed in Societate Civili, & Scientiæ Politicæ Dotibus: Putavi etiam aliquid me Patriæ Bono aut Honori debere, quam semper dilexi; Adeò ut licet Magistratus quos gessi, supra Meritum meum

## *Epistola Dedicatoria.*

meum essent ; Amor tamen meus Boni publici, & Curæ circa illud impensæ, etiam supra, & ultra Gradus, in quibus collocabar, transcenderent. Quocirca, (præsertim cùm Opus illud de *Legibus Patriis* deposuisse,) Honorem aliquem Patriæ dilectæ exhibere volui : Quod operam dedi ut facerem, in *Historiâ* meâ, *Regni Henrici Septimi*. Quantum verò ad *Librum* illum jampridem editum ; Cui antea Titulus ; *Delibationes Morales & Civiles* ; Nunc autem ; *Sermones Fideles, sive Interiora Rerum* ; inscribitur ; Eum etiam multipli- citer auxi, & ditavi ; Et in Linguam quoque Latinam è Vernaculâ, verti curavi. Illud autem Scriptorum genus, Animi reficiendi & levandi caussâ, subinde tracto : Quamvis non sum nescius, ejusmodi Scripta, minore labore & molimine, Nomen meum fortassè magis illustrare & attollere posse, quam reliqua quæ tractavi, & tracto. Quinetiam *Libellum* meum, *De Sapientiâ Veterum*, ut ab interitu tutior esset, in *Tomo Operum meorum Moralium & Politicorum*, rursum eden- dum curavi.

Verum hæc omnia Scripta mea animo revolvens, subiit Cogitatio, universa in *Civitatem*, nulla in *Templum*, proce- dere ; Exceptis paucis alicubi inspersis, quæ ad Religionem spectant. Atqui cùm in *Templo* ipso, tanta Solatia degusta- verim & hauserim, cupio etiam Oblationis quidpiam illuc deferre. Argumentum itaque delegi, mixtum ex Rebus ad Religionem spectantibus, & *Civilibus* ; Atque etiam medium inter *Contemplationes*, & *Activa* ; *Tractatum* scilicet *De Bello Sacro* : Quis enim noverit, num non illud contingere possit ; Exoriere aliquis ? Res magnæ, (præsertim quæ ad Religionem referuntur,) ab exiguis s̄pēnūmerò oriuntur initii ; Et Mo- dulus prius factus quandoque Ædificium ipsum invitat. Hoc Opus, (quia semper *Dedicationes Adulatorias* minus probavi,) Paternitati tuæ dedicare visum ; In pignus veteris nostræ Fa- miliaritatis & Amicitiæ : Nec minus, quia inter Viros Ætatis hujus, Tibi, Reverentiam haud vulgarem, deberi existimem.


Reverendæ Paternitatis tuæ  
Amicus Fidelis,

FR. S. ALEAN.

2. *Amorbius Q. Albiges*

Alcibiades. — *Adversarii*.

MARCH 2, 1913



# DIALOGVS DE Bello Sacro. Interlocutores.

*Eusebius. Zebedæus. Gamaliel. Martius.  
Eupolis. Pollio.*

## Characteres harum Personarum.

**Z**ebedæus Romano-Catholicus, servidus, & Zelotes. **G**amaliel, in Religione Reformatâ, fervidus item, & Zelotes. **E**usebius, Theologus Orthodoxus, & Moderatus. **M**artius, vir Militaris. **E**upolis, Politicus. **P**ollo, Aulicus. **O**mnes præter Gamaliel Romano-Catholici.

Convenerunt Parisiis, in Domo Eupolidis, Eusebius, Zebedæus, Gamaliel, & Martius: Singuli eorum, Viri egregii, sed multum inter se differentes. Aderat etiam Eupolis ipse: Atque dum sederunt colloquentes, intervenit ab Aula Pollio: Ac quamprimum eos vidit, more suo ingenioso, & faceto, dixit.

### P O L L I O.

**V**Ideo quatuor h̄ic præsentes, qui Mundum egregium, (arbitror,) constituere possint: Tantum enim ab invicem discrepatis, quantum quatuor Elementa, & nihilo seciùs concordes estis. Quantum verò ad Eupolidem, quia moderatus est, & placidus, illum loco Quintæ Essentie ponere libet. **EUPOLIS.** Si nos quinque (Pollio) Mundum constituimus maiorem, unicus tu Mundum minorem constituere possis: Siquidem omnia, & profitearis, & connitaris, ad Te ipsum solum referre.

referre. **P O L L I O.** At quid illi, qui hoc agunt, sed minime profitentur? **E V P O L I S.** Sunt illi quidem minus animosi, sed magis metuendi. Verum age, & nobiscum Sermones conseras: Etenim inter Nos, de praesenti *Orbis Christiani* statu, loquebamur; In quo libenter etiam Opinionem tuam audiremus. **P O L L I O.** Domini mei; Iter hoc Mane confeci; Iamque *Aestus Diei* ingruit: Itaque Sermones Vestri, opus est, Aures meas admodum delectent, quo ab Oculis impetrent, ut Somno abstineant. Attamen si permittetis, ut vos excitem, si quando Sermones vestri mihi videantur obdormiscere, quantum potero, Somnum abigam. **E V P O L I S.** Imò gratum nobis feceris, si hoc prestatiteris. Illud tantum metuo, ne universum, quod tractamus, Argumentum, instar *Insomni cujusdam*, haud penitus insulsi & vani, sed *Insomni* tamē, tibi videbitur. Etenim Optata bona, absque spe Effectus, nedum tentandi copiā, non multum illis praestant: Verum ne te diutiū detineamus, cūm ingrediebaris, *Martius* hic, & Attentiones nostras excitavit, & Animos affecit, Oratione suā, quam inchoavit tantū: Neque male cedit hæc res, ad somnolentiam tuam discutiendam: Videbatur enim Sermo ejus, quasi ad Bellum Classicum canorum. Si placet igitur, (*Marti,*) de integro sermonem renoves: Nam & Sermo ipse dignus erat qui repetatur; Atque mehercle, Corona Auditorum ista, non mediocriter dignitate aucta est, per praesentiam *Pollionis*. **M A R T I V S.** Cū modò ingressus es, (*Pollio*) liberè Animi mei Sensum, hisce Dominis meis aperui: Me observasse, quod per dena jam Annorum Lustra, proximè elapsa, minus nobile quiddam spirarunt, (si mihi fas sit dicere,) *Orbis Christiani* Bella, & Expeditiones Militares. Ecce Bella cum subditis, similia Litibus quidem protervis in Foro; in quo pertinaciter Lega- gitur, pro Jure suo recuperando; Quod melius forsan, placido & quieto more, obtineri potuit. Ecce pusillas, Oppidi cuiuspam, aut Portiunculae Territorii, Debellationes; Quales esse solent Rusticorum Acquisi- tiones, Agelli, aut Anguli Terræ, commodè adjacentis. Quod si etiam Bella, pro *Regno Neopolitano*, aut *Ducato Mediolanensi*, aut *Regnis Lusitanis*, aut *Bohemie*, suscepta fuerint; Tamen & hæc ipsa, tanquam Bella Ethnicorum, (*Atheniensium*, *Lacedæmoniorum*, *Romanorum*,) pro secularibus quidem Commodis, & Ambitione Dominationis, gestasunt; Nec *Militia Christiana* censeri debent digna. At *Ecclesia* Missiones suas, in extemos Fines Gentium & Insularum, facit; Nobili Operâ & Instituto; Verum hoc sonat tantū: Ecce unus Gladius hic. Reges & Principes Christiani, meritò accusandi, quod *Fidei Christianæ* propagationi, Armis & Opibus suis, non invigilent. Attamen *Dominus noster*, qui in Terrâ manens, dixit *Apostolis*; Ite & prædicate; Dixit etiam, de Cælo, Constantino; In hoc Signo vince. Quis Miles Christianus, piâ Æmulatione non commo- veatur, cūm viderit Ordinem quandam, *Societas Iesu*, aut *Sancti Francisci*, aut *Sancti Augustini*, tot & tanta, pro *Religionis Christianæ* propagatione, sustinere & perficere; Ordinem vero *Sancti Iacobi*, aut *Sancti Michaelis*, aut *Sancti Georgii*, nil aliud ferè perpetrare, neque majora meditari, quam ut vestes solennes induant, Festa Patronorum suorum anniversaria celebrent, & cæteros Ritus ac Cæremonias Ordinis sui, observent? Quia & Mer- catores ipsi, in iudicio surgent, contra Principes & Proceres Europe: Illi enim,

enim, viam in Mari latam, straverunt & triverunt, usque ad ultimos Oribis Fines ; Classes & Copias Navales, *Hispanorum*, *Anglorum*, *Betgarum*, instruendo & mittendo, quantæ *Indias* quidem, & *Chinam*, terrefacere & concutere possint : Hæc autem omnia, propter Margaritas scilicet, aut Gemmas, aut Aromata, suscepta sunt : At propter *Margaritam* illam *Regni Cœlorum*, aut *Gemmas Cœlestis Hierusalem*, aut *Aromata Horti Sponsi*, Malum quidem Navis ne unum erectum vidimus. Illud interim, pto nihilo ducunt, Sanguinem *Christianum*, in partibus tam remotis, inter se prælantes, effundere ; Sed ne Guttam quidem, in *Caussa Christi*. Venimus, ne immemor videar, Rerum præclararum, in hoc genere, gestarum, fateor intra spatum illud quinquaginta Annorum, (de quo loquor,) aut paulò plus, tres susceptas esse Actiones memorables, à *Christianis*, contra *Infideles* ; In quibus *Christiani* Invasores fuere. Cùm enim Bellum Defensivum sit, Necessitatis potius Bellum judico, quam Pietatis. Prima fuit, celebris illa & felix, Expeditio Navalis, quæ Victoria apud *Insulas Cursolares* terminata est ; Quæ hamum inferuit, naribus *Ottomanis*, usque ad diem hodiernum. Quod Opus præcipue instructum & animatum fuit, ab eximio illo *Principe*, *Papâ Pio Quinto* ; Quem miror, Successores ejus, inter *Sanctos* non retulisse. Secunda fuit, Nobilis illa, (sicut calamitosa,) Expeditio *Sebastiani*, *Lusitanie Regis*, in *Africam* ; Quæ ab illo solo, absque aliorum ope, suscepta fuit ; Ita solo, ut aliis, se postea excusandi, necessitatem imponeret. Pro ultimâ numero, memorables illas Incursiones, a *Sigismundo Principe Transylvaniæ* factas : Cujus Felicitatis Filum à *Christianis* ipsis abscissum fuit ; Contra Monastegregia & Paterna, *Papæ Clemensis Ottavi*. Plures mihi non occurruunt. **P O L L I O.** Pace tuâ, quid dicis de Extirpatione *Maurorum Valentiae*? Ad quam subitam Quæstionem *Martius paululum* obticuit : *Gamaliel* utrem, sermonem arripiens, dixit. **G A M A L I E L.** Planè censco, *Martium* rectè Actionem illam præteriisse : Etenim, mea sententia, damnanda prorsus est. Imò videtur Factum illud *Deo* displicuisse. Cernitis enim *Regem*, sub cuius Imperio, hoc factum est, (Quem vos Catholicæ profanè & immaculato *Principe* habetis,) in ipso Ætatis suæ flore, sublatum ; Auctorem autem, & Suasorem ; Rigoris ejus, (Cujus Fortuna super *Rupem* edificata putabatur,) corruisse ; Quin & opinantur plurimi, Rationes ejus Facti nondum esse transactas, sed iis reddendis *Hispaniam* adhuc esse obnoxiam : Eò magis, quod ingens *Maurorum* illorum Numerus, (Exilio jam probati,) constanter in Fide perseverant, & veros se *Christianos* in omnibus præstant, præterquam quod appetitu Vindictæ, in *Hispanos* flagrent. **Z E B E D E V S.** Noli, obsecro, (*Gamaliel*,) de Actione illâ magnâ temerè judicare ; Quæ instar *Venitabri Christi* fuit in Regionibus illis ; Nisi fortè monstrare poteris, Pactum aliquod *Hispanorum* cum illis Populis, quale *Iosuah* fecit eum *Gibeonitis* : Quo cautum esset, ut execrabilis illa Generatio, Sedes antiquas retineret. Quinetiam vides, *Editio Regio*, hoc Executioni mandatum fuisse, non tumultuari : Gladius enim Manibus *Plebis* neutiquam commissus est. **E V P O L I S.** Arbitror equidem, *Martium* illud omisisse, non quod judicio in alterutram Partem inclinaret ; Sed quia cum Actionibus Belli haud bene congruebat ; Siquidem cum Subditis tantum Res fuit ; Neque Armis

mis contrà itum est. Verum permittamus ( si placet ) Martium in Oratione procedere; Loquebatur enim, (ut mihi videtur,) tanquam Theologus Armis indutus. M A R T I V S. Fateor, (Eupoli,) me in his quæ loquor, Pietatem & Religionem, præcipue mihi ante oculos propone: Nihilominus, si loquendum mihi esset, ut Homini Animali tantum, eadem consulerem. Neque enim reperiri hodiè potest, Expeditio aliqua, aut Actio, etiam respectu secularis Amplitudinis, & Honoris tenui, quæ cum Bello contra Infideles comparetur. Neque in hoc, quod assero, Novitatem aliquam, aut ventosum quidpiam propono; sed quod in Exemplis recentibus, ejusdem generis, se ostendit; Licet fortasse minus arduis. Castiliani, Seculo superiore, Orbem novum aperuerunt; Atque Regnum Mexicanum, Peruviam, Chilen, & alias Indiæ Occidentalis Regiones, subegerunt, & plantarunt. Videmus, quam ingentes opum Fluctus, in Europam, ex eâ re, inundarunt; Adeò ut Orbis Christiani Census, in Decuplum, imò in Vicecuplum, jam auëti sint. Verum est, Aurum, tempore Invasionis primæ, in iis Regionibus, congestum fuisse, & accumulatum; Sed Argenti Venæ adhuc perpetuò scatent. Ex eodem etiam Auso, infinita, Territorii & Imperii, facta est Accessio. Neque enim unquam antehac, Orbis Christianus in Duplum crevit; Quod vere asseri possit, jam esse factum, si computes id quod jamdudum acquisitum est, cum eo quod in posterum acquiri possit, per Occupationem & Culturam earum Partium Ulteriorem. Neque tamen affirmari verè possit, ( si ingenuè loquamur,) Fidei Christianæ Propagationem, Navigationum illarum & Plantationum, Caussam præcipiam extitisse; Sed Aurum, Argentum, Opes, & Gloriam. Ita ut, quod in Dei Providentiâ primum fuerit, in Hominum Appetitu & Intentione, secundas tantum Partes obtinuit. Similia prædicari possint, de Navigationibus & Expeditionibus præclaris, Immanuelis Lusitanæ Regis; Cujus Arma Africam & Afram cingere cœperunt; Atque ad se trahere, non solum Commercium Aromatum, Lapidum pretiosorum, Molchi, & Pharmacorum, sed Sedes & Imperia in Partibus illis Orientis extremis. Neque enim in his ipsis, Religio Christiana, præcipue ante Oculos obversabatur, sed Amplificatio, & Prolatio Imperii, & Divitiarum. Accidit autem jam, ex duobus istis præclaris Facinoribus, cùm Orientales & Occidentales Indias modò sub Hispaniæ Ditione unitæ sint, id quod Magniloquus quidam dixit; Solem in Imperio Hispanorum nunquam Occumbere, sed aliquam ejus Pariem semper irradiare. Quod, (si verum dicendum est,) Radius quidam est Gloriæ, non dico Corpus solidum Gloriæ, in quo Monarchia Hispaniæ, reliquis omnibus Monarchiis, superior sit. Quamobrem, ut concludam, videre est in hisce Expeditionibus, contra Ethnicos & Infideles, Honorem & Utilitatem, tam Spiritualem, quam Temporalem, in una, tam Intentione, quam Prosecutione, coivisse. P O D I O. At, ut mihi videtur, pace tuâ, (Marii,) meminisse debueras, Homines Silvestres & mere Barbaros, similes esse Bestiis & Avibus, quæ Ferre sunt Naturæ; Quarum Proprietas, (qualis esse potest,) Possessionem sequitur, & Occupanti conceditur: Sed in Populis Civilibus hoc non tenet. M A R T I V S. Ego certè nūt tale Discriminis agnosco, inter Animas Rationales; Sed contrà sentio, quicquid in ordine sit, ad Bonum Populi alicujus majus, & Iustius,

latius, Actionem posse Injustitiam absolvere, concessso quod populus sit, sive magis, sive minus, cultus & civilis. Verum, non facile tibi concedam, (Pollio,) Populos, Peruvianum, aut Mexicanum, ita penitus fuisse Barbaros, vel Feros, ut Oratio tua innuit: Aut quod talis poni debeat differentia, inter illos, & alios, Infideles, qui hodiè in Locis plurimis degunt. In Peruvia, licet nudi fuisse, tēperaturā fortasse Climatis hoc postulante; Et Consuetudines nonnullæ admodum Barbaræ apud eos invaluerint; Attamen Administrationi certè Incarum, in aliquibus, Humanitas, & Civilitas, non defuerunt. Reduxerant Nationes illas, ab Idolorum omnigenū Adoratione, ad Adorationem Solu. Atque, (quoniam memini,) Liber Sapientiae Gradus Idololatriæ distinguit: Constituens Idolorum vilium & despiciabilium Cultum, magis cæcum & detestandum esse, quam simplicem Culum Creaturæ. Et similiter, (nisi fallor,) faciunt quidam ex Prophetis, Ponentes Culum Idolorum, per Metaphoram, tanquam turpissimam & Maxime bestiale Fornicationem. Insuper Peruviani, sub Imperio Incarum, magnifica habuerunt Tempa superstitionis suæ: Justitiæ Administratio apud eos viguit: Obedientiam & Fidelitatem constantissimam Regibus suis exhibebant: Etiam, contra Hostes, cum Justitiâ quadam Militari procedebant, ac si jus Fæcialium novissent, Legem suam, tanquam meliorem, iis offerentes, antequam Gladium stringerent. Neque absimilis erat Politia Regni Mexicanæ, quod Monarchia Electiva, non Hæreditaria, erat. Quatenus verò ad Populos Indie Orientalis, (Goæ, Calecutti, Malacæ,) erant illi populi delicati & lauti; Frugi certè, cum quadam Elegantiâ, et si parùm bellicosí. Ita ut si æquâ lance res ponderetur, Imperium Turcarum censi possit magis barbarum, quam horum quoduis. Tyrannis crudelissima; Polluta Sanguine Imperatorum suorum in Successionibus singulis; Mancipiorum & Vassallorum Massa; Sine Nobilibus; Sine Generosis; Sine Ingenuis; Hæreditates nullæ; Nullæ Stirpes antiquæ; Gens sine Affectionib; Naturalib; Quæque (ut ait Scriptura,) non mouetur Desideriis Mulierum; Immisericors, & incuriosa ergi Liberos proprios; Gens sine Institutionibus Moralibus; Sine Literis, Artibus, & Scientiis; Quæ vix Jugerum Agri, aut Horam Diei mensurare nōrit; Sordida, & immunda, in Ædificiis, Vielu, & Similibus: Atque, (ut verbo dicam,) Opprobrium merum Generis Humani. Ista tamen Natio, Hortum Mundi, in Eremum vertit. Nam, (ut rectè habetur in Proverbio,) *Vbi Equus Ottomanni pedem ponit, Populus vix cresceret.*  
**P O L L I O,** Veruntamen, in medio Invectivæ tuæ, (Martii,) Turcas jure suonon prives, Eos neutiquam pro Idololatriis habendos esse. Etenim, si, (ut ipse modò dixisti,) discrimen haud parvum sit, inter Cultores Idolorum vilium, & Solis; Majus se offert Discrimen, inter Cultum Creaturæ & Creatoris. Agnoscunt enim Turcæ Deum Patrem, Creatorem Cæli & Terræ, primam in Trinitate Personam, et si reliquias duas negant. Ad quem Sermonem, cum Martius conticuisset, occurrit Zebedæus, vulnu commotore, & reprehensionem spirante, & dixit. **Z E B E D A U S.** Caendum sedulò, (Pollio,) ne in Hæresin Immanuelis Comneni, Imperatoris Graecie, imprudentes labamur; Qui asseruit, Mahomeris Deum, verum esse Deum: Quæ Hæresis à Synodo non solum rejecta & damnata est, sed Imperatori imputata, veluti Insanæ Species quædam: Quam etiam ei

exprobavit *Episcopus Thessalonicensis*, verborum Acerbitate minimè reputandâ. **M A R T I U S.** Ingenuè fateor, me in illâ opinione esse, *Bellum contra Turcas*, plus *Justitiae & Meriti* habere, quam contra alios quoscunque *Gentiles*, aut *Barbaros*, qui aut fuerunt, aut nunc sunt, tam *Religionis* Intuitu, quam *Honoris*: Licet Facilitas forsitan, & Spes perficiendi, ad aliam magis Electionem invitare possit. Verum antequam ulterius progredior, tum & ipse libenter respirarem; Tum etiam *Dominationes* vestras obnixè rogarem, ut Sermonis vices excipiatis, qui melius eas sustinere potestis: Sed & præcipue hoc mihi occurrit, quoniam in Conventu nostro hîc aliquos video, qui egregii *Legis Divine* Interpretes sunt, etsi Dogmatibus nonnullis dissentientes. Ipse autem, non sine ratione, judicio meo diffido, tum quod in seipso infirmum sit, tum quod Zelo & Ardore, in hac Causâ abtripi possit: Itaque vitio mihi verti possit, si plura de hac re dissererem, priusquam Fundamenta solidè jacta videam, quæ *Justitiam Actioni* huic asserant; Ab iis, qui in *Justitiâ Causæ* discutiendâ, meipso magis versantur, & peritiores sunt. **E U P O L I S.** Magnâ certè lætitia afficio, (*Marti*), cùm intueor in Viro Militari tantam Animi Moderationem; Quandoquidem in re, quæ sanguinem excalefaciat, atque insuper speciem habeat Sanctitatis, non abripiaris, ad prætermittendam, aut pro concefso admittendam, Considerationem *Justitiae*. Atque quoniam, (ut mihi videtur,) *Colloquium* hoc nostrum feliciter procedit, si *Dominationes* vestræ annuant, nonnulla de Distributione Argumenti in Partes proponam. *Cui Rei cùm omnes assensissent*, Eupolis dixi. **E U P O L I S.** Mihi certè non incongruum videtur, si *Zebedæum* exoraremus, ut Quæstiōnem hanc discutiat; Utrum *Bellum* propter *Fidei Christianæ Propagationem*, absque aliâ aliquâ Hostilitatis Causâ, jure suscipi possit: Et in quibus Casibus. Fateor insuper, libenter me audire velle, Dissertationem de *Iure*; Non solum Permissivo, sed etiam utrum non obligentur *Principes Christiani*, & *Respub.* ad hujusmodi *Bellum* inferendum? Quam Partem si *Gamalieli* placuerit in se recipere, Quæstio de *Iure*, simpliciter accepta, plenè discussa fuerit. Superest Quæstio *Comparativa*; Nempe, dato, quod hæc Res, aut Legitima, aut Obligatoria sit, utrum tamen aliæ Res eam prævertere non debeant: Veluti, Extirpationes Hæresium; Schismatum Reconciliationes; Morum Reformationes; Prosecutiones Titularum, & Jurium, pro Temporalibus Dominiis, & Vindictis; Et hujusmodi: Atque insuper, in quantum *Bellum* istud *Sacrum*, cæteras illas Res, vel præstolari debeat; vel cum iis pari passu incedere; vel illas compescere, & in ordinem redigere, tanquam se inferiores? Quoniam autem hæc Pars latè patet, atque *Eusebius* adhuc silentium tenuit, (si *Dominationes* vestræ jubeant,) illam, per viam Multæ, ei imponemus. Interim veteor, ne *Poli*, qui perspicaciâ & acumine pollet, ad distinguendum, quid sit in Rebus solidum & grave, quidque rursus speciosum & phantasticum, hæc omnia nihil aliud esse existimaturus sit, quam Impossibilia, & *Aquilas* (ut dicitur,) *in nubibus*: Itaque eum rogabimus, ut Argumentum hoc totis viribus stringat & premat; ut ab eomoniti & edocti, rem aut rejiciamus, si inveniatur tumida & inflata, aut saltē ab eâ separemus, quicquid insit inane, & minime

minimè sperabile. Atque quia īgetiuē fareor, me in aliā opinione esse; (etsi cum *Pollione* dimicare dura sit Provincia,) tamen quantum in me est probare connitar, rem hanc perfici, & ad Exitum perduci posse: Atque ostendam, quibus Modis Impedimenta omnia & Obstacula, vel tolli, vel superari, queant. Tum verò tempestivum erit *Martio*, (si rem prius non deposuerimus,) Sermonis Partes resumere; tam quoad *Suasoriā*, quam quoad *Consiliatoriam*; Quibus scilicet *Mediis*, *Apparatiis*, cæterisque denique quæ ad *Activam Partem* condūcant, administrari possit: Verùm hæc quæ dixi, pro tenuitate Judicii mei, in medium adduxi; *Dominationes* vestræ rem melius disponent. *Universi*, non solum Distributionem probârunt, sed etiam suis partiibus acquiecerunt. Verùm, quia inclinabat *Dies*, *Colloquium* in *Mane* *Castrinum* differre consenserunt. Solummodo Pollio dixit. **P O L L I O.** Sanè, (*Eupolis*) de me recte conjicis. Planè enim sentio, nisi *Orbem Christianum* veluti Pistillo contundatis, & novam inde Massam conficiatis, de *Bello Sacro*, spem nullam reliquam esse. Atque semper hoc apud me statui, *Lapidem Philo-sopicum*, & *Bellum Sacrum*, Diverticula tantum esse Cerebrorum nonnulli læsorum; Et eorum, qui Plumas in Capite gestant, non in Pileo. Veruntamen, pro Humanitate vestrâ, mihi credite; Si vos quinque contraria senseritis; Præsertim, postquam ea, quæ in animo mihi sunt, recensuerim, paratus ero cum *Hippocrate* renunciare; *Athenienses insanire*, solum autem *Democritum sanum esse*. Atque, ne me à Negotio penitus abhorrere judicetis, ab initio jam aliquid contribuam. Vos proculdubio varia & egregia comminiscemini; Sed facite quod jubeo. **Papa**, qui nunc sedet, decrepitus est, & Mors ejus quotidiè expectatur, non secus quam si Campana jam pulsaret. Date operam, ut post eum eligatur **Papa**, minimè Senex, Annorum quasi inter quinquagesimum & sexagesimum: Assumat autem sibi Nomen *Vrbani*; Quia ejus Nominis **Papa**, primò *Cruciata* instituit; Et tanquam *Tubâ Sacra* Expeditiōnem in *Terram Sanctam* exitavit. **E U P O L I S.** Benè ais. Sed esto, si placet, paulò plus serius, in hoc *Colloquio*.

*Die sequente* idem convenerunt, prout constituerant; Cumque consedissent, & aliquid à *Pollione* faciarum inspersum esset; Qui sic ludebat; Bellum iandudum inchoatum esse; Se enim, per totam noctem, nihil aliud, quam de Janissariis, & Sultanis, & Tartaris, somniasset; *Martius* dixit. **M A R T I V S.** Distributio *Colloquii*, quæ ab *Eupolide* heri facta est, & à Nobis approbata, m hi sanè videtur omnino perfecta & absoluta, præterquam unâ in Parte: Loquor autem, non de Numero Partium, sed de earundem Ordine & Collocatione. Ita enim dispositum est *Colloquium*, ut *Pollio* & *Eupolis*, Possibilitatem aut Impossibilitatem Actionis ventilarent, antequam ego *Mediorum* & *Apparatum* Declarationem explicaverim. Ipse autem prius animadverti in Deliberationibus, Ingressum propinquorem, in Considerationem *Modi* rei gerendæ sive exequiendæ, Opinionem prius conceptam, de Possibilitate aut Impossibilitate, penitus subvertisse: Adeò ut, quæ primo intuitu Possibilita videbantur, inquirendo in Modos perficiendi, Impossibilitatis convicta fuerint: Et econtrario, quæ Impossibilita quis primò putasset, *Mediorum* rursus Explicatione, (tanquam Lumen à Dorso Rerum posito, & affulgente,) se ostenderint Possibilita; Quæ

anteà impervia putabantur, perviis factis. Hoc autem non èò dico, quo Ordinem Interloquendi immutarem, sed solummodo ut à Pollio & Eupolide impetrarem, ne quid peremptoriè & conclusivè pronuncient, donec me de Executionis Modis differentem audierint : Atque deinde ad replicandum sine præjudicio se reseruent, postquam ante Oculos, veluti Modulum quendam Rei gerendæ contemplati sunt. Pergrave istud, & sobrium Martii Monitum, & Cautio, plurimum à reliquis collaudata : Vnde Eupolis dixit. EUPO LIS. Cùm Martinus aliquid corrigere incepit, in eo quod heri decretum est, licebit & mihi, (præfertim in propositione quadam, quam ipse intuli,) Omissionis alicujus meminisse : Quæ plus est quam Collocatio Partium præpostera. Quantum enim conjicio, addenda, & inferenda erat Quæstiōni de Iure, hæc Appendix ; Quousque Bellum sacrum sit prosequendum ? Nempe ; Utrum usque ad Eradicationem & Exterminium Populorum ? Atque insuper, utrū Res ad hoc deducenda sit, ut Fides Nova Armis compellatur ; Religio falsa vi & suppliciis vindicetur ; An potius, ut Regiones & populi solummodo subjugentur ; unde per Gladium secularem, via aperiatur, ad Gladium spiritualem, qui Persuasione, Instruktione, & hujusmodi Remediis, quæ ad Salutem Animarum, & Informationem Conscientiarum, propria sunt, penetret ? Sed fieri potest, ut hoc, quod tanquam omissum noto, seorsim in Partem constitui opus non sit ; Quia Zebedæus, pro eâ quâ pollet prudentiâ, in eam sponte incidet ; Tanquam Annexum quoddam Quæstiōnis de Iure ; Quæ discuti & determinari non potest, absque Distinctionibus, & Limitationibus. ZEBEDÆVS. Confirmator certè reddor, (Eupolis,) cùm videam judicio tuo, (quod tanti æstimo,) id probari, quod ipse apud me facere institueram. Quemadmodum enim Martinus benè notavit, rem esse laxiorem de Possibilitate differere, priusquam Modi ipsi conficiendi in medium adducantur ; Similiter se habet, de Iustitiâ diffinire, absque Recensione & Consideratione Casuum Particularium. A principio itaque Casus distinguam : Etsi veniam mihi dabitis, si eos seorsim singulos nimis præcisè non discutiam : Nam & prolixum hoc foret ; Ac rursus, non in Artibus aut Methodis occupati jam sumus, sed in Colloquio Deliberativo. Primum igitur in genere quæritur, (sicut Eupolis anteà memoravit,) utrū Principibus Christianis, Bellum Invasivum inferre liceat, solummodo & simpliciter, propter Propagationem Fidei, sine aliâ quapiam Hostilitatis causâ ? Secundò, quæritur, posito in partem Casus, quod Regiones illæ olim Christianæ, & Ecclesiæ Membra erant, ubi Candelabrum aureum steterat ; Etsi jam planè defecerint, neque Reliquiae ullæ sint Christianorum ; Utrum licitum non sit, Bellum inferre, ut illæ Ecclesiæ denuò reuniantur, tanquam vetus Christi Patrimonium ? Tertiò quæritur, addito in partem Casus ulteriorem, Multitudinem adhuc Christianorum magnam, in illis locis degere ; utrū licitum non sit, Bellum inferre, ad illos à Iugo Infidelium liberandos ? Quartò, utrū Bellum inferri justè non possit, ad recuperandum & expurgandum, Loca Sacra & solennia, modò polluta & prophanata ; Qualia sunt Civitas, & Sepulchrum, sancta ; Et hujusmodi Loca, ubi Adoratio, & Devotio, se in primis exercuerunt ? Quintò, utrū Bellum licitè fieri non possit, ad ultionem capiendam, de Blasphemis,

## Dialogus de Bello Sacro.

343

Blasphemii, & Contumelias, vero Deo, & Servatori nostro, illatis ; Aut de Effusione Sanguinis Christiani, quamvis multis retrò seculis facta ; Quandoquidem Judicia Divina, Cancellis temporum minimè concludi, & multoties Peccatorum tantum Maturitatem expectare, constet ? Sexto, in Considerationem venit, ( Id quod modo proposuit Eupolis ; ) utrum Bellum sacrum, ( quod, sicut Caussæ dignitate, ita & Prosecutionis Justitia, aliis omnibus præcellere debet ; ) Urgeri licet possit, usque ad Expulsionem & Internacionem Populorum, Vim Conscientiis inferendam, atque hujusmodi Acerbitates exercendas. : vel qualis adhibenda sit Moderatio, & Limitatio, Nec dum Christianos nos esse meminerimus, alios Homines esse oblivisci videamur. Intervenit tamen Articulus quidam, qui hos universos præcedere debeat ; Et ferè missos faciat, quantum ad hoc Particularē Bellum contrā Turcas : Qui in mentem mihi forsitan non venisset, nisi Martium heri, Tyrannidem Turcarum, tam ad vivum, Oratione sua depingentem, audissem ; Quam tu Pollio Invectivam appellasti, licet reverè justa esset & debita Contestatio ; Et quanto in animo magis revolvo, tanto plus in Opinione illâ confirmor ; Atma scilicet pro Imperio illo debellando, et si Religionis Caussam sepnamus, licet sumi posse. Postquam Zebedæus ista dixisset, aliquanti per respiravit, si quid forie cœperi, in eam rem injectissent : Sed postquam nil alud, quam Silentium, & Attentionis signa observaverat, adeo quæ dicturus erat, hoc modo perrexit.

ZEBEDÆVS. Dominationes vestræ, in hac Quæstione, de Iure Belli Sacri contra Turcas, non expectabunt à Me Tractatum justum ; Sed Sermonem tantum, qualis Deliberationi conveniat : Atque ad hujusmodi Brevitatem, & Modum Dicendi, me componam. Primum hoc concedam ; Sicut Belli Caussa justa esse debet ; Ita, ejus Caussæ Justitia, oportet ut sit liquida ; Non obscura, aut scrupulis implicata. Etenim, omnium Legum consensu, in Caussis Capitalibus, Probationes requiriuntur, plenas esse & evidentes. Quod si hoc postulandum sit, ubi Unius Vita periclitatur ; Quid de Bello dicemus, ubi semper in innumeros, Mortis Sententia fertur ? Cavendum itaque in primis, ne immolando Cruorem Hominum, per Bellum injustum, Beatissimum Servatorem nostrum, ad Similitudinem Moloch, aut idol Eibnici, adoremus. Iustitia Actionis cuiuscunquæ consistit ; In Meritis Caussæ ; In legitimâ Iurisdictionis Autoritate ; Atque in prosequendi Modo debito : Quantum enim ad Interiorem interiorem, eam Curiæ Cæli relinquo. De his separatim, prout referri possint, ad Subjectum præsentis, Belli Sacri contra Infideles ; Et nominatim, contra potentissimum illum, & maximè Formidabilem Fidei Hostem, Turcam. Evidenter teneo, & confido me liquidò probaturum, ( quantum per Summam quandam, & Capita tantum Rem, Probatio haberi possit,) Bellum contra Turcam justum esse, & legitimum ; Tam Iure Naturali, quam Iure Gentium ; Nec non Iure Divino, quod illorum duorum est Perfectio. Quatenus verò ad Legem Positivam, & Civilem, vel Romanorum, vel aliorum quorumcunque ; Machinæ sunt illæ certè nimis exiles, quæ tantæ Quæstionis pondus regant. Itaque, meo iudicio, Multi ex Recentioribus Scholasticis, (et si Homines alias egregii,) non rectâ quidem insistunt viâ, ad Quæstionem illam discussiendam ;

cutiendam; Nisi fortè Donum Navii nacti sint; Ut Cōtem novaculâ scindere queant. Primo, quantum ad Legem Naturæ: Aristoteles Philosophus non malus ejus Legis Interpres, Multorum Ingenia exercuit, Scito illo ingenioso; De Naturâ Domino, & Naturâ Servo. Affirmando, disertis verbis, & peremptoriè, usque à Natalitiis, res aliquas natas esse ad regendum, aliquas ad parendum: Quod Oraculum, secundum varios sensus acceptum fuit. Acceperunt illud nonnulli, pro sermone Jactantiæ; ut Græcorum in Barbaros Imperandi Jus assereret; Quod Thema defensum melius fuit à Discipulo ejus Alexandro. Alii acceperunt veluti Modulum quendam speculativum; Quod Natura & Ratio, hoc volunt & poscunt, ut meliores imperent: sed neutquam ut jure hoc vindicare possint: Verùm ego, nec pro Verborum Jactantiâ, nec pro voto quodam aut Optato, illud accipio; Sed pro Assertione verâ, quemadmodum ab illo diffinitur, & limitatur. Sic enim asserit. Si inveniri possit Dispartitas talis & Inæqualitas, inter Hominem & Hominem, qualis inter Hominem & Brutum cernitur, aut inter Animam & Corpus, Jus planè Imperandi inducit: Quod videtur potius suppositio impossibilis, quam Sententia ueritatis expers. Vcrùm, meâ quidem opinione, & Sententia recta est, & Suppositio possibilis; Atque ejus Naturæ, quæ locum habuit & habet, tum in viris aliquibus, tum in Nationibus. Sed antequam ad reliqua pergamus, Ambigua quædam, & à Sensu vero Sermonis nostri multùm aberrantia, ne interpellant, abigamus & relegemus. Si quis asserat, eos, qui magis Ingenio pollent, & Meritis præcellunt, Jus tale ad Imperandum obtainere, ut minùs dignos pervim subjicere, & sibi in Servitutem redigere, licitum sit, Nugæ meræ sunt: Suffragia Hominum nunquā in eo coibunt, ut declaretur, quis sit dignior. Etenim, si ordinem Naturæ spectes, non solum ei Dominium debetur, qui Intellectu eminet, ut Aristoteles asserit; Sed non minùs ad Imperium requiruntur, Fortitudo ad protegendum; & ante omnia, Probitas & Rectitudo, ad abstinentiam ab Injuriâ. Ita ut perplexa planè res sit, diffinire, quis ad Imperandum habilis magis sit. Alii siquidem Viri, aliæ Gentes, in his præponi debent; Alii in illis. Itaque, Thesis, quam adduco, non tenet in Comparativo; Nempe, ut prudentior, aut fortior, aut justior, Natio regere debeat; sed in Privativo: Hoc scilicet volumus: Si cubi reperiatur ejusmodi Cumulus aut Congeries Populi (etsi forsitan Regnum vel Imperium vocetur,) omnino indigni qui imperent, justa Belli Caussa oritur, ut ii subjugentur, à Nationaliâ Civili, & ad Imperandum habili: Imò licet hoc à Cyro quopiam, aut Cæsare, qui Christiani non fuerunt, fieri supponatur. Secundus Error, quem exulare volo, hic est; Ne quis hoc à me dici putet, de Tyrannide aliquâ personali; Sicut Imperium Romanum fuit, sub Caligulâ, aut Nerone, aut Commodo: Numnam Populus quæso, plecti debeat, ob id, in quo jamdudum plectitur? Sed ubi ipsa Statûs Constitutio, & Consuetudines, & Leges ejus Fundamentales, (si modo Leges appellari mereantur;) Ius Naturæ, & Generum, planè convellunt: Tum (inquam) Bellum contra eos, justum censi ri debet. Quæstionem autem istam in tres Partes dividam. Primo, utrum existere possit, Natio aliqua, vel Hominum Cætus, quibus justum sit, Bellum inferre, absque Injuriâ aliquâ præcedente qua vindicanda

## Dialogus de Bella Sacro.

365

da sit, aut provocatione? Secundò, quæ tandem sint illæ *Iuris Naturæ*, & *Gentium*, Violationes, & Impugnationes, quæ omni Jure ad regendum spoliant, & privant? Tertiò, utrum hujusmodi *Legis Naturæ*, & *Gentium* Violationes, inveniuntur hodiè in aliquâ Gente, & nominatim in Imperio *Ottomanorum*? Quantum ad primam, Nullo modo affirmare hæsitaverim, Gentes tales, aut Cætus Hominum, existere posse. Hujus rei Fundamenta ponî non possunt magis solida, quam si in Donationem Imperii Originalem, & Primitivam, inspiciamus. Observa igitur Verba Donationis illius, Præcipue Praefationem. Dixit Deus, *Faciamus Hominem ad Imaginem & Similitudinem nostram*, & domineur piscibus Maris, & Vola libis Cœli, & Bestiis Terræ. Hinc Franciscus de Victoria, & alii nonnulli, egregie inferunt, atque extrahunt verissimum & plane divinum Aphorismum, *Non fundatur Dominium nisi in Imagine Dei*. Hic habemus Chartam Donationis omnis Domini. Facilius itaque erit, de Caussis Revocationis, aut Amissionis ejusdem, judicare. *Imaginem si deleas, Jus unum cessat*. At *Imago* hæc quid est, aut quomodo deletur? Pauperes Lugdunenses, & hujusmodi Spiritus-Fatatici, respondebunt, *Imaginem Dei esse Puritatem*; Id autem, quod dicit, esse Peccatum. Verum hoc ad Eversionem Imperii omnis spectat. Neque Peccatum *Adami*, aut Maledictio illud secuta, eum Jure Domini sui privavit, sed in Creaturis, Rebellionem tamum, & Reluctationem, excitavit. Itaque, (si diligenter attendas,) cùm Charta ista, Noach & Filiis, post Diluvium, renovaretur, non sit per Verba Restitutionis Domini, qualia erant prima, *Dominamini*; &c. Sed, *Terror vester, ac Tremor vester, erit super cuncta Animalia Terræ, & super omnes Volucres Cœli*, cum universis quæ moventur super Terram; Imperium minimè de novo concedendo, quod ratum manebat, sed contra Reluctationem illud protegendo. Interpretes igitur saniiores, hanc *Imaginem* interpretantur, esse Rationem Naturalem; Quæ si in toto, aut maximâ ex parte, deformetur, *Imperii* extinguitur: Atque si Interpretum omnium Sententias diligenter perpendas, de Casu dubitant, non de Lege. Sed hoc propriè tractandum veniet, cùm de secundâ parte disseremus; Quæ ipsas *Imaginis* Deformationes explicabit. Verum pergamus. Hoseas Propheta, in Personâ Dei, de Iudeis dicit, *Ipsi regnaverunt, & non ex me; Principes constituerunt, & non cognovi*. Qui Locus aperte indicat, Dominia quædam esse, quorum Deus se Auctorem negat. Etsi enim occultâ ejus prvidentiâ ordinentur, Voluntate tamen ejus Revelatâ minimè agnoscantur. Neque hoc de Gubernatoribus malis, aut Tyrannis, intelligi potest; (Illi enim, in Scripturis, sæpenumerò Auctoritate muniuntur, & stabiliuntur, tanquam Potestates Legitimæ;) Sed de Perversitate aliquâ, & totali Defectione, in Gente, aut Populo ipso: Quod ex eo liquidò colligitur, quandoquidem Propheta loquitur, de Dominio in Abstracto, non de Personâ Domini. Licet autem nonnulli, ex iis quos diximus, Hæretici, Textu hoc abusi sint, eumque male distorserint; Sol tamen, in transitu per Cloacas, non inquinatur. Atque insuper, si quis inferat, ex Verbis Prophetæ sequentibus, (quæ hanc Rejectionem, ob Idolatriam eorum, factam, declarant,) Interpretatione istâ, omnium Nationum Idolatriarum destitui Dominia, (quod perspicue falsum est;) Hoc meo iudicio

dicio non sequitur, *Idolatria* enim *Iudæorum*, eo tempore, atque *Idolatria Ethnicorum*, quæ tum fuit, & hodiè invenitur, Peccata sunt Naturæ inter se multùm discrepantis, respectu Fœderis specialis, & Manifestationis clarioris, quibus Deus seipsum Nationi illi devinxit, & exhibuit. Hæc Imperii Nullitas, & Dominii Privatio, quam in Nationibus aliquibus reperiri dicimus, significantius adhuc, à *Mose*, exprimitur, in *Cantico* suo, sub Personâ *Dei*, *Iudeos* alloquentis ; *Ipsi me provocasti in eo, qui non est Deus* ; *Et ego vos provocabo, in eo, qui non est populus*. Tales, (proculdubio,) erant Populi *Cananæorum*, & reliqui, post Donationem, *Terre Promissionis*, *Israelitis* factam. Ab eo enim tempore, Jus eorum in Terram illam corruit, et si in Locis compluribus, Armis subjugati non fuerint, sed in Possessione manserint. Ex hoc videre licet, Nationes quasdam nomine-tenus existere, quæ Nationes jure non sunt ; sed Multitudines tantum & Examina Populorum. Quemadmodum enim *Homines* quidam sunt, quos Ex-leges appellamus ; Proscripti scilicet, per Leges Civiles diversarum Regionum : Ita etiam, Nationes quædam sunt, Ex-leges factæ, & proscriptæ, per Jura Naturæ, & Gentium ; Aut per Mandatum *Dei* immediatum. Sicut etiam Reges quidam sunt, de Facto, & non de Jure, respectu Nullitatis Tituli eorum ; Ita Nationes quædam reperiuntur, Terras & Possessiones suas, de Facto, & non de Jure, occupantes, respectu Nullitatis Politiae, aut Regiminis sui. Sed recipiamus Exempla aliqua in Medium Probationum nostrarum ; Etenim sic disposita, non minus probabunt, quam si in finem rejiciantur ; Tum verò illustrabunt magis. Indubitatum semper fuit, Bellum contra *Piratas*, justè geri posse, per Nationem quamcunque, licet ab iis minimè infestam, aut læsam. An quia certas Sedes, aut Lares, non habent ? At in *Piratico Bello*, à *Pompeio Magno* gesto, (Quodque reverà, inter Bella quæ gessit, ei maximè honorificum, & gloriosum fuit, ) *Piratæ* nonnullas Urbes tenuerunt, Portus quamplurimos, etiam magnam Provinciæ Ciliæ partem : Atque *Piratæ*, qui hodiè sunt, *Iulio Cæsario*, Receptum habent. Bestiæ non idèò minus feræ, quia speluncas habent. An quia periculum ab iis, tanquam Nubes, volitat & volvitur, ut nesciamus in quam partem erupturum sit ; Adeò ut omnium, sine discrimine, Res agatur ? Ratio certè hæc posterior, bona ; Illi tamen non insunt omnia ; Neque profectò ea est, quæ ut plurimum allegatur. Vera enim Caussa hujus Rei hæc est ; Quod *Piratæ* Communes Humanæ Generis Hostes sint ; Quos idcirco omnibus Nationibus persecuti incumbit, non tam propter Metus proprios, quam respectu Fœderis inter Homines Socialis. Sicut enim quædam sunt Fœdera in Scriptis, & in Tractatus redacta, contra Hostes particulares inita ; Ita Naturalis & tacita Confœderatio inter omnes Homines intercedit, contra communes Societatis Humanæ Hostes. Adeò ut, ad hujusmodi Bella indicenda, non opus sit Denunciatione aliquâ solenni ; Non expectanda Supplicatio à Natione læsa ut summittantur Auxilia ; sed istiusmodi Formulas omnes supplere *Ius Naturæ* in *Bello Piratico*. Idem censendum est, de *Latronibus* per Terram, & *Insidiatoribus* Viarum ; Quales adhuc dicuntur *Pagi* nonnulli *Arabum*, & *Reguli* quidam *Montani*, qui secus angustas vias, & à Viatoribus frequentatas, habitant. Neque (ut priùs de *Piratis* dictum est,) *Principibus* tantum

tantum vicinis, hos debellare conceditur; verum etiam, si quae Natio sit, quantumvis longè dissipata, quæ Merito & Gloriæ sibi duceret, *Bellum* istud suscipere; (veluti *Romani* olim *Bellum* gesserunt pro liberandâ *Graciâ*,) proculdubio hoc facere cum *Justitiâ* possint. Nec absimile pronuntio, de *Regno Assassorum* jam extincto, quod situm erat super Fines *Saracæ*, atque olim, magno, *Principibus Orientis*, pro tempore, terrori fuit. Ibi consuetudine receptum erat, ut *Regis Mandato*, & ex cæcâ obedientiâ eidem præstandâ, quivis illorum obligatus esset, & veluti voto obstrictus, ad Cædem cuiusvis *Principis*, aut Personæ, perpetrandam, quam *Rex* suus designavit. Consuetudo ista, sine controversia, totum illud Regimen invalidum reddidit, & nullo jure subnixum; Tanquam Machinam quandam, contra Societatem Humanam extrinxit, quæ ab omnibus incendi, & destrui meruit. Idem pronuntio de *Anabaptistis Civitatis Monasteriensis*, etiamsi *Imperatori* Rebelles non fuissent; Atque etiamsi nil sceleris reverâ commisissent. Quin & si adhuc fuerit, aut in futurum exorturus sit, Hominum Cœtus aliquis, qui teneret & poneret, omnia licita esse, notex præscripto Legum, aut Regularum aliquarum, sed ex Motu & Instinctu secreto & vario Spiritu; Hic proculdubio Natio nulla censenda, Populus nullus, nulla Politia, quam *Deu*s agnoscit: Cuivis sanè Nationi, Populum hunc, (si ad Sanitatem redire recusat,) exterminare penitus ex cœtu Hominum, & à facie Terræ delere licebit. Proponam jam *Exemplum Rei fictæ*: Et tamen Veteres in dubio reliquerunt, utrum Res ficta fuerit, an Historia vera. Illud intelligo de *Gente Amazonum*; ubi Regimen, tam publicum, quam privatum, etiam Militia ipsa, penes *Fœminas* residuebat. Num quis sanæ Mentis affirmaverit, hujusmodi Imperium, contra Ordinem Naturæ, in principiis suis, institutum, non esse in se vacuum, & nullum, & proorsùs abolendum? De summo *Fœminarum* Imperio non loquor; Id enim Consiliariis, & Magistratibus subordinatis, Masculis, suffulcitur; Verum, ubi Regimen Status, Justitiæ, Familiarum, à *Fœminis*, & non aliis, administrabatur. Attamen, *Exemplum* hoc postremum, à prioribus differt, eò quod in illis Periculi Metus supponatur, in hoc autem Aberratio tantum à *Lege Naturæ*. Neque hæsitârim idem affirmare de *Sultaniâ Mamalucoram*, ubi servi, & nulli alii, pecuniâ empti, & stirpis incognitæ, Liberis imperabant. Huic affine esset, si *Gentem* aliquam supponas, apud quam Consuetudo talis recipetur, ut *Filio*, quamprimum ad plenam Etatem pervenerint, *Parentes* è possessionibus suis expellerent, & eis stipendium tantum solverent: *Exempla* enim ista, Imperii *Fœminarum* in *Viros*, *Filiorum* in *Patres*, *Servorum* in *Liberos*, similia & cognata inter se sunt; Cum in his omnibus, *Ius Naturæ* & *Gentium*, manifestò violetur & pervertatur. Quantum ad *Indos Occidentales*, video (*Marti*), te *Garcilassum de Viega* legisse; Qui & ipse è stirpe *Incarum* fuit; & proles militia extitit; Atque Virtutes, & Mores honestiores Patriæ suæ libenter memorat; etsi certè sobriè hoc, & perquam modestè faciat. Attramen mihi haud facile persuadebis, Nationes illas, à quavis Natione, quæ Virtutibus Moralibus culta & imbuta esset, subjugari non potuisse; Li-*ter Propagatio Fidei* seponeretur, nec in partem *Casus* admitteretur. Certè, Nuditas illorum, quâ plerunque usi sunt, absque ullo omnino ve-

lo aut Tegumento, magnæ deformitati fuit : siquidem in Nuditatis Conscientiâ, sensus primus Peccati constitit ; Atque Hæresis Adamitarum, semper habita est, tanquam Opprobrium Naturæ. Sed hoc Fervoribus Regionis detur, quandoquidem sit illis cum aliis nonnullis Gentibus commune. Neque rursùs simplicitatem eorum commemorare placet, licet insignis fuerit ; utpote qui Equos Fræna ipsorum manducare ; Literas autem loqui, & commissa sibi nunciare, putarent ; Et similia. Neque etiam Sortilegia, Divinationes, & Magicas Superstitiones narrô ; In quibus, cum plerisque Gentibus Idololatriis, communicabant. Verum affirmo, Consuetudinem apud illos, Homines sacrificandi, & multò magis Carnes Humanas manducandi, tantam Abominationem fuisse, ut erubescere cogatur, quicunque certè negaverit, Morem hunc execrabilem, cum aliis improbissimis, coniunctum, Hispanis justam Caussam tribuisse, Territoria eorum invadendi, ut per Legem Naturæ proscripta ; & Populum vel reducendi, vel expellendi. Absit tamen à me, Crudelitatibus & Cædibus, quæ sub initiis adversus illos grassabantur, patrocinari ; Quæ certè Mercedem suam paulò post receperunt ; Cùm ne unus quidem ex primis earum Regionum Occupatoribus extiterit, qui non ipse violentâ Morte periret ; Quemque etiam, Mors & Calamitas, compluriam è suis, non aut comitabatur, aut à tergo insequebatur. Sed Exemplorum sat ; Nisi forte huc adjicias Labores Herculis : Exemplum sanè, quod licet Fabulis multis turgeat, hoc tamen in primis habet ; Quod insigniter demonstrat, omnium Nationum & Ætatum Consensum, in Extirpationibus & Debellationibus, Gigantum, Monstrorum, & Tyrannorum Enormium approbandis ; Non solum tanquam justis, sed tanquam Facinoribus egregiis ; Quæque Divinos, aut saltem Heroicos, Honores mererentur : Atque hoc, licet Liberator ille, quisquis tandem sit, ex una Orbis Extremitate ad alteram penetraret. Jam autem, Exemplis his prælibatis ad Argumenta redeamus, Pondus potius, quam Numerum, spestantes, ut in huiusmodi Colloquio par est. Primum Argumentum hoc erit. Damnandus certè error ille, tanquam pusillanimitatis nimiae, si quis existimet, Nationibus aut Gentibus, nullum inter se Vinculum intercedere ; nisi aut sub Rege eodem uniantur, aut per Pacta & Foedera scientur. Aliæ siquidem Societatis Obligationes sunt, & Confœderationes tacitæ & implicitæ. Exempli gratiâ. Illa Coloniarum, aut aliò Transmigrantium, erga Nationem Progeneticem suam. Neque pro nihilo habendum, si Genes unius Labii sint : Sicut enim Confusio Linguarum Nota erat Separationis ; Ita Linguae Communio Nota Unionis. Isdem Legibus Fundamentalibus, & Consuetudinibus Generalibus uti, adhuc majus quiddam est ; Quod Genus Conjunctionis, in Græcis, respectu Barbarorum, vigebat. Super omnia autem eminet, magna illa & indissolubilis, inter Homines universos, Consanguinitas & Societas, de quâ Poeta Ethnicus, (Paulo Apostolo citante, ) Ipsius enim & Genus sumus. Multò magis Consanguinitatis illius Jura, inter Nos Christianos colenda sunt ; Quibus specialiter revelatum, omnes Homines ex una Massâ Terræ prodidisse ; Cunctasque Orbis Generationes, è duobus Protoplastis, propagatas esse. Nos (inquam) sine Hæsitatione ullâ agnoscere debemus, nullas Genes inter se peregrinas, aut Sanguinis alieni esse ; Neque Charitatis

## Dialogus de Bello Sacro.

349

tiratis sensu minùs affici, quam *Senex ille Comicus* præ se tulit, qui dixit ; *Homo sum, Humani nihil à me alienum puto.* Quod si ea intercedit, qualem diximus, inter Homines universos, Confœderatio, certè alicui Fini inservit, nec proorsus otiosa est. Aliquas ergo Actiones, aliquas Res respicit. Quæ tandem illæ sunt ? Num fortè hoc *Fædus contra Feras*, aut *Elementa Ignis & Aquæ*, initur ? Nequaquam : Sed contra Hominum Cœtus & Greges quospiam, qui à *Lege Naturæ* penitus desciverunt & degeneraverunt ; Quique in Corpore ipso suo, & Fabricâ Statûs, Monstrorum quiddam habent ; Qui denique, juxta *Exempla* dudum prolata, communes Humani Generis, Hostes & Gravamina ; Atque insuper Opprobria Naturæ, & Dignitatis Humanæ, meritò censerî possint. Tales Hominum Greges, omnium Nationum interest, tam vividi sensus esse, ut, si fieri possit, supprimant ; Quandoquidem Populus ipse, qui talia patitur, Remedium sibi ipsis præstare nequeunt. Atque hoc, quod dicemus, metendum est, non tam ex *principiis Iureconsultorum* ; Quam ex *Lege Charitatis* ; *Lege Proximi*, quæ non minùs Samaritanum quam Levitam, includit ; *Lege Filiorum Adæ de Massâ unâ*, Super quas Leges Priorius Opinio ista fundatur ; Quas impugnare, (si liberè loqui liceat,) fuerit propemodum, in Naturâ Schismaticum esse.

Vera haec aut si de legibus naœ oeo reguli consentirent  
sed cum artum sit nullam scilicet oib. regulis et rebus dictis  
longe in hoc trahi superius videtur quod  
**Reliqua perficere non vacabat.**



Ælfric's Anglo-Norman

ရွှေမြန်မာစာမျက်နှာ



NOVA  
ATLANTIS  
Fragmentorum alterum.

PER

Franciscum Baconum,  
Baronem de Verulamio,

Vice-Comitem S. Albani.



LONDINI,  
Typis Ioh. HAVILAND.

Prostant ad Insignia Regia in Cœmeterio D. Pauli,  
apud locos am Norton & Richardum Whitakerum.

1638.

# A V O N S I T Y M A L T A

PER

Imprimatur.

Reverendissimo in C H R I S T O Patri, & Dom.  
D. Arch. Cant. Sacellanus Domesticus,

Decemb. 7. 1637.

G V I L. B R A Y.



L O N D I N I  
T y p s I o n H A V I L A N D

Printed at London in Regis in Coemeterio & T am  
ab apud locum Non ton & Ricardum Wm p[ri]m[us]




# Lectori S.

**F**abulam hanc *Novae Atlantidis* eo animo  
confinxit *Honoratissimus Auctor*, ut in eâ  
Modulum quendam & Descriptionem *Col-  
legii*, ad Interpretationem Naturæ, & Ope-  
rum Magnitudinem ac Potentiam, instituti,  
exhiberet: Idque nomine *Domus Salomonis*,  
sive *Collegii Operum sex Dierum*, insigniret. Atque eò usque  
Sermonis Filum produxit, donec hoc consiceret. Modulus,  
(fateor,) pro more Poetices, grandior & celsior est, quàm  
qui, in omnibus, Imitationi pateat; Veruntamen, in pleris-  
que, Industria Hominum sibi non diffidat. In animo etiam  
habuit, hac ipsâ in *Fabulâ*, *Librum de Legibus*, sive de optimo  
Civitatis statu, exarasse; Sed cùm Opus hoc prolixum futu-  
rum prævideret; Nec-non *Historie Naturalis* colligendæ,  
aliarumque *Instauratio*nis Partium contexendarum, (quas  
longè potiores duxit,) desiderio abriperetur; Hic pedem  
fixit. Hæc habui in Mandatis; Lege, & Vale.

Guil. Rawley.

H h 2





# Nova Atlantis.

**N**

Avigavimus è P E R U V I A, ubi per Annūm integrū commorati sumus : - Petebainus autem Chinam, & Iaponiam; Commēatum in duodecim Menses nobiscum portantes ; Atque per spatiū quinique Mensium, & amplius, Vētis secundis ab Ortu flāntibus, licet lenioribus & remissioribus, usi sumus. Tum vērō vertit se ventus, & ab Occidente, per multos dies, constanter spiravit ; Adeò ut progreedi lentē admodūm possemus, atque de Reditu quandoque cogitaremus. Sed tunc rursūs, orti sunt Austri, fortes & vehementes, cum Inclinatione nonnullā in Orientem ; Qui nos (quantum fieri potuit) contrā nitentes, versus Septentrioñem compulerunt : Quo tempore Commēatus noster, ( et si parçē admodūm eum distribuissimus,) penitus absumptus. Itaque, cūm Nos ipsos, in Medio Vastissime, per universum Orbem, Aquarium Ereī, positos videremus, absque Commēatu, perditos nos planè putabamus, & Mortem propinquam expestatibamus. Attamen Corda nostra, & Voces, ad Deum in Cælū levavimus ; Qui Mirabilia sua in profundis monstrat ; Eum precantes, pro Misericordia suā, ut quemadmodūm, in principio, Congregationes Aquarum mandavit, & Aridam apparere fecerat ; Ita nūc quoque Terram Nobis ostenderet, ne periremus. Contigit autem, ut diē sequente, sub vesperi, intra modicam distantiam, cernēremus, Septentrionem versus, tanquam Nubes spissas ; Quæ Nobis de Terra spem injecerunt ; satis graris, Tractum illum Maris Australis, penitus incognitum fuisse : Atque Insulas, & Continentes, adhuc non detectas, complecti potuisse. Itaque Cursum, totā illā nocte, eō direximus, ubi Terra se, ut conjiciebamus, ostenderat : Atque illucescente die postero, manifesta fuit, id quod videramus, Terram rēverā fuisse ; Depressam quidem & siluosam ; Quod eam magis obscuram monstravérat. Atque post Sesqui-Horæ Navigationem, Portum Tūtum appulimus : Portum Urbis cuiusdam, non magnæ quidem, sed pulchrè extuctæ, & quæ, ex quā parte Mare spectabat, Elegantiam magnam præ se tulit. Nos verò si regula Momenta tarda estimantes, quibus a Terra abessemus, ad Litus properavimus ; Et ad Descensum in Terram nos comparavimus. Confestim autem vidi-

mus, nonnullos ex Populo urbis, cum Bacillis in Manibus, qui nutu & signis, nos in Terram descendere prohibuerunt ; Absque tamen Clamoribus, aut Ferociâ. Unde, haud parum contristati, quid faciendum esset, apud Nos deliberabamus. Interim perrexit versus Nos Scapha haud magna, octo circiter Viros vehens ; Quorum unus in manu gestabat Baculum ex Arundine luteâ, ad utrumque finem cæruleo colore imbutum ; Qui Navem nostram fidenter conscendit. Cumque vidisset unum è nostris obviam illi prodeuntem, è sinu extraxit Rotulum quendam Pergamentum, ( sed Pergamentum nostrum paulò flavioris, atque ad instar Foliorum Codicillorum splendentis, alias autem mollis satis & flexibilis,) Eique in manum dedit, qui primus è nostris se obtulerat. In quo Rotulo, Lingua Hebraicâ priscâ, Græcâ quoque priscâ, Latina satis purâ, & Hispanicâ, scripta erant hæc Verba ; In terram ne descendatis ; Nendum quispiam è vestris. Quin & Discessum ab his Oris maturate, intra sexdecim dies ; Nisi licentia Vobis diutius morandi concedatur. Interea, si Aquâ Vobis opus sit dulci, aut Commeatu, aut Medicinâ & Curatione pro ægrotis, aut si Navis vestra reparazione indigeat, singula, quibus careatis, in scriptis exhibete ; Nos autem Officiis ullis Misericordiæ Vobis non deerimus. Rotulus iste, sigillo firmatus erat, ex Alis Cherubim ; Minime expansis, sed deorsum pendentibus ; Et juxta eas Cruce. Hoc tradito, Minister ille discessit, & unum ex Famulitio suo nobiscum reliquit, qui Responsum nostrum reportaret. Cùm jam apud Nos, de hac re deliberaremus, timidi & anxii hærebamus. Arceri à Descensu in Terram, & moneri de præproposito nostro Discessu, malè nos afflixerunt : Contrà, cùm videremus, Populum illum Linguas externas callere, tantaque Humanitate præditum esse, consolatiōni nobis erat non exiguae : Ante omnia, signum Crucis Instrumento appositum, singulari gaudio nos affectit, tanquam Salutis Augurium manifestum. Responsum à Nobis est Lingua Hispanicâ, Nam nostram satis commodè se habere ; Quandoquidem Malacias, & Ventos convarios, potius experii essemus, quam Tempestates : Quantum ad ægrotos nostros, eos plurimos esse, quin & graviter laborantes ; Ita ut nisi Descensus in Terram illis permittetur, de vita periclitarentur. Alia, quibus carebamus, speciatim exhibuimus ; Addentes ; Adeisse nobis Merces pauculas, quas si eis emere placere, necessitatibus nostris subveniri posse, ne illis oneri essemus. Obtulimus Servo præmium exiguum in Ducatis, & Holoferici Carnosini parcellam, quæ Minister superiori offerretur : Sed ille non accepit, imò vix aspicere sustinuit : Atque ita, in aliâ parvâ Scaphâ, quæ adeum missa fuit, discessit.

Tribus plus minus Horis elapsis, postquam Servus Responsum nostrum accepit, Lembo versus nos deiectus est, Vir (ut videbatur) ex Magistratibus. Indutus erat Togâ cum Manicis amplis, ex Cameloto, Coloris cærulei pulcherrimi, splendidioris multò quam Nos in Europa habemus : Tunica interior viridis erat ; Et similiter Galerus ejus, qui factus erat in Figuram Turbani, eleganter compositi, neque prægrandis, qualia solent esse Turcica ; Atque Capillorum suorum Cincinni, infra oram Turbani dependebant. Vir sanè aspectu venerabilis. Vectus est in Lembo, aliquâ ex parte inaurato, quatuor solummodo Viris, in eodem Lembo, comitatus. Alius autem à tergo sequebatur, in quo erant Viri circiter viginti. Quamprimum intra spiculi jactum venisset, signis qui- busdam